

DA' GOSON POSTLW CA'

Jesúsen' gwne' sele' Spiritw che Diosen'

1 ¹ Teófilo, ca nac dan' bzoja' da' nechw, bzoja' yogo'lo' da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede' ² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. ³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwdalene' legaque' choa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e. ⁵ Da' zaque' ben Juan da' bzoe' bene' nis, perw yeto chope ža da' zaca'ch gac chele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teze šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo' na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. ⁸ Perw na' cate' yedesoa Spiritw che'na' len le'e, gaclenen le'e len yela' guac chenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

⁹ Beyož gwna Jesúsen' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'. ¹⁰ Na' ne' chesena'te bene' ca' le'e yaban' gan' besele'ede' beyepe', cate'cze gosacbe'ede' ba zjazecha chope angl len legaque' bene' zjanyaz lache' šiš. ¹¹ Na' bene' ca' chope gose'e legaque':

—Bene' Galilea, žbixchen' chna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che bene' Israel ca'. ¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa

yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. ¹⁴ Na' gosenita'teze postlw ca' šnej chosol güiže' Diosen' txen len bene' ca' zjanaque' biše' Jesúsén' na' len María xna' Jesúsén' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

¹⁶ —Bene' migw, Spiritw che Diosen' benen cont rey David bzoje' na' be'e diža' che Judasen' ben' gwche' bene' ca' gosezen Jesúsén' gan' jasešague' le'. Na' benen byen goc can' nyoj Xtiža' Diosen'. ¹⁷ Judasen' goque' txen len neto' na' bene' txen len neto' yogo'lol dan' gwyo'o lo na'to' bento'. ¹⁸ Na' gosezi'e late' yežlio len mechw dan' gwxi' Judasen' bene' da' malen' bdie' Jesúsén' lo na' bene' ca'. Perw na' blažoe' cosyichj gan' goladite' na' gošj li'ena', doxen xjaloen' bchoj. ¹⁹ Yogo' bene' že' Jerusalenna' gosenezde' can' goc chen' na' da'nán' bososi'e yežlion' Acéldama na' xtiža'gaque'na' zejen Yežlio Chen. ²⁰ Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te bene' yoble yolane' žin dan' bene'.

²¹ Na' nga nita' bene' ba gosone' txen len chio' šlac gwdalen Xancho Jesúsén' chio'. ²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyała' cuejcho toe' gone' txen len neto' postlw güe'to' diža' can' beban Xancho Jesúsén' ladjo bene' guat ca'.

²³ Na' gosebeje' chope bene', toe' José ben' le Barsabás, na' lecz le' Justo, na' ben' yeto Matías. ²⁴⁻²⁵ Nach bosol güiže' Diosen' gose'ene':

—Xanto', le' nombi'o yichjlaždao' yogo'lol bene'. Lao bene' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca' nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

²⁶ Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

Can' goc cate' bla' Spiritw che Diosen'

2 ¹ Na' bžin ža lni dan' že' Pentecostés, na' postlw ca' na' yogo'lol bene' ca' ba gosejnilaže' Jesucriston' zjandop zjanžague' toze latje. ² Na' zejzenez goc to sšag le'e yaban' ca' sšag che to be' bdonon' gual na' nenxeje lo' yo'o gan' zjachi'ena'. ³ Na' besele'ede' gala'ze yichj to toe' gosezoa tgüeje yi' bel da' čala'nin. ⁴ Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

⁵ Na' ca tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'. ⁶ Na' cate' gosende' chac sšaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'. ⁷ Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga? ⁸ ¿Nacxechen' to tocho chenecho cheso'e diža' can' cheso'e bene' gualaž checho diža'? ⁹ Balcho naccho bene' nación Partia, na' balcho bene' nación Media, na' balcho bene' nación Elam, na' balcho bene' distritw Mesopotamia. Na' yebalcho bene' distritw Judea, na' yebalcho bene' distritw Capadocia, yebalcho bene' distritw Ponto, na' yebalcho bene' distritw Asia, ¹⁰ yebalcho bene' distritw Frigia na' bene' distritw Panfilia, na' yebalcho za'cho nación Egipto, na' yebalcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, balcho goljcho naccho bene' Israel na' yebalcho ben cuincho txen len bene' Israel. ¹¹ Na' balcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso'e bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

¹² Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

¹³ Na' yebale' goseneye'e gosene':

—iBene' quinga chesezožde'!

Diža' dan' be' Pedroa' len bene' Israel ca' besežag

¹⁴ Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. ¹⁵ Bene' lježa' quinga bitw chesezožde' can' chaquele, le ne' nac tempran. ¹⁶ Ba chac can' bzoj da' Joel ben' be' xtiža' Diosen' can' bzoje' dan' gwna Diosen', žan:

¹⁷ Cate' ba zoa žin ža cont yeyož yežlion',

neda' Dios gona' cont Spiritw chian' yedesoan len bene' že' doxen yežlion'.

Na' gona' cont xi'inle ca' yeso'e xtiža'na',

na' bene' byo xcuide' ca' yesele'edagüede' bi da' gona',

na' güe'lena' bene' byo gol ca' diža' lo bišgal chegaquen'.

¹⁸ Na' yogo' bene' ca' chesejnilaže' neda', bene' byo na' no'ole,

yedesoa Spiritw chian' len legaque' cont yeso'e xtižan'.

¹⁹ Gona' cont yesele'e benachen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca
bejw.

²⁰ Bich gwseni' gwbižen', na' bio'na' yeyaquen xna ca chen
cate' za' žin ža yida' da' yoble gwnežjua' castigw che yogo' bene' cbi
chesejnilaže'nda', neda' naca' Xanle.

Žana' gaquen to ža žialao xen.

²¹ Nach note'tez bene' yesenabe' gaclena' legaque',
neda' naca' Xanle yebeja' legaque' lo da' malen'.

Can' gwna Diosen'.

²² Na' le'e bene' Israel gualaž chia', le gwzenag chia'. Jesús'en' ben' nac
bene' yež Nazaret, Diosen' blo'ede' naque' bene' zaque'. Diosen' bene'
cont Jesús'en' bene' yela' guac na' bichle da' zaca' yebanecho can'
nezeczelen'. ²³ Lo yela' neze che Diosen' bin' za' gac, bi'e latje gwzenle
Jesús'en' na' bdelene' lo na' bene' mal ca' gosote'ne' bosode'ene' le'e yag
cruzen'. ²⁴ Perw na' Diosen' bechis bosbane'ne' ladjo bene' guat ca', le bi
gwzoe yela' goten' nabian' le'. ²⁵ Quinga bzoj da' rey David xtiža' Jesús'en'
cani'te, žan:

Nezda' Xana' Diosen' zoe' len neda' do ža do yel,
na' zoe' chaclene' neda' cont bi chžeba'.

²⁶ Da'na'na' zoa' mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca'
cate' ba gota'.

²⁷ Dios chia', nezda' bi yocua'ano' neda' gan' že' bene' guat ca',
neca go'o latje gožo' cuerp chia'na', neda' naca' xi'ino' na' nac
lažda'oguan' xilaže'.

²⁸ Ba blo'edo' neda' can' soa' cueza' mbalaz.
na' mbalaz soa' dan' soaleno' neda'.

Beyož gwna Pedroa' ca' nach gože' legaque':

²⁹ —Bene' Israel, nezecho da' xozxta'ocho rey David gote' na'
bosocuaše' le'. Na' nombia'cho ba gan' bosocuaše' le'. ³⁰ Na' da' rey Davin'
be'e diža' can' bzejni'i Diosen' le' na' gwnezde' gwlo'o Diosen' da' bali
gague da' te bi gac can' gwne'. Gwnezde' gon Diosen' cont Criston' galje'
lo diaža che' na' nabi'e nación Israelen' can' gwnabia' le'na'. ³¹ Diosen'
bene' cont da' rey Davin' gwnezde' can' gaquen' na' da'nan' be'e diža' che
Criston' ben' ba gwseła' Diosen' cont nabi'e. Gwne' Criston' yebane' na' bi
yega'ane' gan' že' bene' guat ca' na' neca gožo' cuerp che'na'. ³² Na'
Diosen' bechis bosbane' Jesús'en' ladjo bene' guat ca', na' yogo' neto'
choe'to' diža' nezeto' beyas bebane'. ³³ Na' Diosen' len yela' guac che'na'
bene' cont beyep Jesús'en' gan' zoe'na' na' chnabi'e txen len le'. Na'
Diosen' bnežjue'ne' Spiritw che'na' can' gwne'. Na' Jesús'en' ba bene' yela'
guac nga da' ba benele na' da' ba ble'ele. ³⁴ Gague da' rey Davin' beyep
yaban', san da' David bzoje' che Jesús'en' gwne':

Xancho Diosen' gože' Xanan':

“Gwche'edo' cuita' nga nabia'cho txen,

³⁵ na' gona' cont yogo' no chesegue'e le' yosozexjw yichje'
yosozenague' chio'.”

³⁶ 'Da'nan' yogo' chio' bene' Israel cheyala' nezecho Jesúsen' ben'
betwle bda'lne' le'e yag cruz, Diosen' gwleje'ne' cont naque' Xanchon' na'
naque' Cristo, zeje diža' naque' ben' gwsela' Diosen' nabi'e nacion'
chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da'
gosacde' lo' lažda'ogaquen', nach gose'e Pedroa' na' len yezica'chle
postlw ca':

—Bene' gualaž, čbin' cheyala' gonto'?

³⁸ Nach Pedroa' gože' legaque':

—To tole cheyala' yetinjele xtola'le ca' na' soale nis dan' ba
chejnilaže'le Jesucriston', na' Diosen' yezi'xene' che'le na' gone' le'e
Spiritw che'na' soan lo' yichjlažda'olen'. ³⁹ Xancho Diosen' gone'
note'tezle Spiritw che'na' can' ba gwne', le'e na' xi'inle ca' na' note'tez
bene' zito', le chnežjuen' yogo' bene' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwneyoede' legaque'
gwne':

—le yechoj ladjo bene' mal quinga bene' cbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na'
lo žana' šon mil bene' gosejnilaže' Jesúsen' na' gosaque' txen len
yezica'chle bene' chesejnilaže' le'. ⁴² Yogüe' gosenita'teze' bosozenague'
dan' bososed bosolo'e postlw ca' legaque'. Na' gosaque' toze len
yezica'chle bene' gosejnilaže' Jesúsen' na' gose'ej gosagüe' txen na'
gosenite' bosol giüže' Diosen' txen.

Can' goson bene' ca' gosejnilaže' Criston' da' nechw

⁴³ Na' yogo'ze bene' besyebande' can' goson postlw ca' da' zan da' güen
da' zaca' yebanecho len yla' guac che Diosen'. ⁴⁴ Na' bene' ba
chesejnilaže' Jesúsen' gosaque' toze na' gosone' toze yogo'lol da' zjade
chegaque'. ⁴⁵ Na' gosote' yežlio na' bichle da' zjadede' na' mechw dan'
besele'ede' chen goseyisen' lao yogo'lole' con da' beseyažje to toe'. ⁴⁶ Na'
tža tža besedop besežague' yodao' blaona' na' lecze do laže' gose'ej
gosagüe' txen liž to togaque' na' gosenite' mbalaz. ⁴⁷ Gosenita'teze'
gosonxene' Diosen'. Na' gosazlaže' bene' yezica'chle can' gosone'na'. Na'
tža tža Xancho Diosen' bene' cont gosanch bene' ca' gosejnilaže'
Jesucriston'.

Beyac to bene' nxinj ni'e

3 ¹ Na' to ža Pedroa' na' Juan ja'aque' yodao' blaona' do cheda šone,
hor cate' bene' Israel ca' chosol giüže' Diosen' yogo' ža. ² Na' gwzooa
to bene' nxinj ni'e ca' goljte' na' yogo' ža gosebec bene' le' cho'a puert che

yodao'na', puert dan' nzi' Puert Xdan, cont gwnabe' mechw lao bene' ca' chja'ac yodao'na'. ³ Nach cate' bžin Pedroa' len Juan yodao'na' na' ben' nxinj ni'ena' bol güiže' legaque' yosonežjue'ne' mechw. ⁴ Nach Pedroa' len Juanna' gosebeze' na' gosena'chgüe' le' na' Pedroa' gože'ne':

—Gwna' neto'.

⁵ Na' bena' bene' xbab yosonežjue'ne' mechw. ⁶ Perw Pedroa' gože'ne':

—Bibi mechw chia' de da' gona' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' bexoe' ne'e licha na' bsože'ene', na' gocte gwzeche' na' ni'ena' la' besyeyacten da' gual na' lecz ca' bechj ni'e ca'. ⁸ Na' cate' gocbe'ede' ba besyeyac ni'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choxcen che Diosen'. ⁹ Na' bene' ca' že' chašilen' besele'ede' can' chde' chxite' cho'e yela' choxcen che Diosen'. ¹⁰ Na' besyeyombi'e le' naque' ben' chbe' chnab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'. ¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, ¿bixchen' chebanele? ¿Caquele len yela' guac cheton' bento' cont beyac benga? ¿Še caquele beyaque' dan' chonchguato' can' chazlaže' Diosen'? Bi naquen ca'. ¹³ Dios ben' gosonxen da' xozxta'ocho Abraham, Isaac na' Jacob, blo'e nac Xi'ine' Jesúsén' bene' zaca' juisyw. Perw le'e bdele Jesúsén' lo na' justis ca' cont gosote'ne' na' bžonle cate' Pilaton' goclaže' gwsane'ne'. ¹⁴ Can' benle len Jesúsén' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwñable bosan Pilaton' to bene' güetw bene' na' bi gwñable yosane' Jesúsén'. ¹⁵ Na' ca' nac Jesúsén' ben' bxe yela' mban toli' tocane, le'na' betwle, perw na' Diosen' bechis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'. ¹⁶ Na' chle'ele benga cbi goc se'e na' nombia'lné', na' na'a ba beyac ni'ena' len yela' guac che Jesúsén' ben' chejnilaže'to'. Le da' chejnilaže'to' Jesúsén', da'nan' besyeyacšagüe' ni'a benga na' ba chle'ele can' beyaquen'.

¹⁷ Bene' migw, nezda' le'e na' bene' gole blao chele ca' betwle Jesúsén' lagüe bi gwyejni'ile Diosen' gwsele'ne'. ¹⁸ Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che'

gosene' yosochi yososaca' bene' le'. ¹⁹ Da'nan' le yeyonšca xbab chele na' le yetinje xtoła'len' cont Xancho Diosen' gwnitlagüen' na' gone' ga soale mbalaz. ²⁰ Nach Xancho Diosen' sele' Jesúsén' yežlio nga yetni'a, ben' gwleje' cani'te cont naque' Cristo checho. ²¹ Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. ²² Da' Moisésén' be'lene' da' xozxta'ocho diža', gože' legaue': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'. ²³ Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisésén' da' xozxta'ocho ca'.

²⁴ Lecz ca' yogo'lol bene' goso'e xtiža' Diosen' cani', gwzolaozen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a. ²⁵ Le'e nacle xi'in diaža che da' bene' ca', na' dan' gož Diosen' legaue' gone', na' dan' gože' yezica'chle xozxta'ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz." ²⁶ Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaže' gaclene' chio' cont to tocho yetinjecho xtoła'chon'.

Pedroa' na' Juanna' nite' lao bene' gwnabia' ca'

4 ¹ Ne' chesoe'lente Pedroa' na' Juanna' bene' ca' diža' cate' besežin bał bxoz che bene' Israel ca', na' bene' gwnabia' che ben' chesape' yodao' blao chegaue'na' na' bene' saduceo ca' bene' cbi chesejle'e še yesyeban bene' guat ca'. ² Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsén'. ³ Na' bene' blao ca' gosezene' Pedroa' len Juanna' na' goseyixjue' legaue' ližya do yel, le ba chxin na' bi goła' yesone' yela' justis chegaquen' ca' cheyala' že'na', san bosocuezen' beteyoch. ⁴ Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

⁵ Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalénna' ⁶ len Anás ben' naquech bxoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bxoz blaon'. ⁷ Na' gosone' mandadw jasexi'e Pedroa' na' Juanna' na' cate' ba zjazie' laogaquen' gosenabde' legaue':

—¿No ben lsens chele cont beyonle bene' nxinjen'? o ¿no yela' guac che bchinle beyonlene'?

⁸ Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao che nación Israel chechon', ⁹ chñable nac bento' da' güen beyonto' bena' nxinj ni'ena'.

¹⁰ Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac che' cont beyacšagüe' benga. Le'e betwle Jesucriston' bda'ln'e' to le'e yag cruz, perw Diosen' bečhis bosbane'ne' ladjo bene' guat ca'. ¹¹ Bi gwyejle'le che Jesucriston', da'nan' zaca'leble ca bene' cheson yo'o bene' bi chesazlaže' yej güen da' ba naquen yej squin che yo'ona'. ¹² Toze Jesucriston' guac gone' chio' yela' mban toli tocane, na' noch no zoa doxen lo yežlion' bene' gac gone' yela' mban toli tocane che chio' benach.

¹³ Besyebane bene' gwnabian' can' boži'i Pedroa' na' Juanna' xtiža'gaquen' sin cbi besežebe', le nacbia' zjanaque' bene' yiže' na' bi zjansedteque'. Nach gosacbe'ede' legaquen' ba gosedalene' Jesús'en'.

¹⁴ Na' dan' zecha ben' beyaque ni'ena' txen len Pedroa' na' Juanna', bi besyežele bene' gwnabian' bi yesene' chegaque'. ¹⁵ Nach bene' gwnabian' besyebeje' postlw ca' chyo'ole šlac bosoxi'e' legacze' nacle yesone'. ¹⁶ Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalén ni zjanezde' gosone' to yela' guac xen na' bi gac ye'cho bene' bi gosone' yela' guaquen'. ¹⁷ Letechoze goncho cont cbi gaslas diža' dan' cheso'ena'. Da'nan' cheyala' ye'cho legaque' gata' castigw chegaque' še yesoe'che' xtiža' Jesús'en'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesús'en' na' noch no yososed yosolo'ede'. ¹⁹ Nach Pedroa' na' Juanna' bosyoži'e' xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'? ²⁰ Bi gac cuzto' bich güe'to' diža' che da' ba ble'eto' na' ba beneto'.

²¹⁻²² Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwdie' čhoa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'lol can' gose' bχoz gwnabia' ca' na' bene' gole blao ca' legaque'. ²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' beno' yaban' na' yežlion' na' nisdaon'. Len' beno' benach na' be ca' chesaš na' bica'chle da' zjade, na' len' chnabi'o doxen.

²⁵ Na' le' beno' cont da' rey David bzoje' diža' quinga dan' gož Spiritw chion' le', žan:

Benē' ca' cbi zjanaque' benē' Israel chesase' contr le', Xanto' Dios, perw bicze gac can' chesone' xbabēn'.

²⁶ Benē' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwselo' cont nabi'e.

²⁷ Na' Xanto' Dios, naquen da' li rey Herodes na' Poncio Pilato na' benē' cbi zjanaque' benē' Israel gosaque' txen len benē' Israel ca' lo ciuda nga. Na' yogüe' gosone' txen cont gosote' Xi'ino' Jesúsēn' ben' nac benē' laždao' xilaže' juisyw, ben' gwlejo' cont nabi'e. ²⁸ Gosone' can' gwchogbi'o gac dan' bžio' bia' cani'te. ²⁹ Na' na'a Xanto', gwna can' cheson benē' gwnabia' ca', le chesacłaže' yosošebe' neto' benē' güēn žin chio'. Na' goclen neto' cont bi žebto' güe'to' xtižo'na'. ³⁰ Na' cate' güe'to' xtižo'na' blo'ešca yela' guac che Xi'ino' Jesúsēn' benē' laždao' xilaže' juisyon' cont gac yela' guac, na' yesyeyac no benē' chesacšene na' gac bichle da' yesyebane benē'.

³¹ Na' cate' beyož bosol güiže' Diosēn', Diosēn' bene' gwxo' gan' zjandop zjanžague'na' na' Spiritw che'na' gwzoachguan len legaque', nach goso'e xtiža' Diosēn' sin cbi besežebe'.

Gosone' dan' zjade chegaque' toze

³² Na' yogo' benē' ca' gosejnilaže' Criston' toz ca' gosac yichjlažda'ogaque'. Na' yogo' bi da' zjade chegaque' gosonen' toze, na' nono gwna: "Chia' da' nga", o "Chia' da' na", le naquen che yogo'lol gaque'. ³³ Na' postlw ca' len yela' guac xen che Diosēn' bosozejni'ide' benē' Jesúsēn' bebane' ladjo benē' guat ca'. Na' Diosēn' goclenchgüe' legaque' len bi dan' gosone'. ³⁴ Na' bibi goc falt bi da' beseyažje benē' gosejnilaže' Criston', le benē' zjanape' no yežlio o no yo'o gosoten'. Na' mechw dan' besele'ede' che to ton ³⁵ bosonežjuen' postlw ca', na' postlw ca' goseyisen' len benē' beseyažjden'. ³⁶ Can' ben to benē' Chipre benē' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' benē'. ³⁷ Joséna' bete' to yežlio che' na' mechw dan' ble'ede' chen bnežjuen' postlw ca'.

Da' mal dan' goson Ananías na' Safira

5 ¹ Na' zoa to benē' le Ananías na' no'ol che'na' Safira, na' gosote' to yežlio chegaquen'. ² Perw na' legacze' bosoxi'e yosonežjue' late'ze mechw dan' besele'ede' chen na' yese'e postlw ca' doxenēna'. Nach gwyej Ananíasēn' na' bnežjue' postlw ca' mechon'. ³ Nach Pedroa' gože'ne':

—Ananías, ¿bixchen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosēn'? Chi'o neto' chono' doxen

mechon' dan' ble'edo' che yežlion', len ba gwlo'ošagüe'le laten' par cuinle. ⁴ Chio' yežlion' cate' biña' goton', na' chio' mechon' dan' ble'edo' cate' beton' na' zaco' cont beno' da' chaclažo' len len. ¿Bixchen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananíasen' cate' bende' xtiža' Pedroa' to gwbiẋze' na' gote'. Na' yogo' bene' ca' gosende' diža' can' goquen' besežebchgüe'. ⁶ Na' besežin to čhope bene' xcuide' gan' gwbiẋ da' Ananíasen' na' bosyochele' cuerp čhen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwyo'e lo' yo'on sin cbi nezde' bin' ba goc che bene' čhen'. ⁸ Na' Pedroa' gože'ne':

—¿To ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—¿Bixchen' goco' toze len bene' čhion' chaquele gonle Diosen' prueba še lede' can' že' bi cheyała' xoayagcho? Cho'a puert nga zjazecha bene' ba bosocuaše' bene' čhio'na' na' na'a yeso'e le'.

¹⁰ Na' la' gwbiẋte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' che'na'. ¹¹ Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón. ¹³ Na' yezica'chle bene' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'. ¹⁴ Perw na' zane' gosejnilaže' Xanchon' na' gosaque' txen, zan bene' byo na' no'ole. ¹⁵ Na' cate' no' bene' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'. ¹⁶ Na' bene' ca' že' yež da' zjachi' gala'ze ciuda Jerusalénna' ja'aque' zjanche'e bene' chesacšene na' bene' zjajo'o zjanyaz da' xigüe'. Na' yogo'lole' besyeyacde'.

Bene' saduceo ca' goseyixjue' Pedroa' len Juanna' ližya

¹⁷ Nach ben' nacch bxoẋz blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. ¹⁸ Na' gosezene'ne' na' goseyixjue' legaque' ližya. ¹⁹ Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

²⁰ —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban čhegaque' toli tocane.

²¹ Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bꝥoz blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. ²² Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'. ²³ Gose'e bene' ca':

—Nyeyjwčhach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

²⁴ Na' ben' nacch bꝥoz blao na' bene' gwnabia' che ben' chesap yodaon' na' bꝥoz gole blao ca' cate' gosende' rsonna' besyebande', gosene':

—¿Nac gac da' nga na'a?

²⁵ Na' šlac chesacžejlaže', bžin to bene' gože' legaque':

—Bene' ca' gw dixjwle ližyan' zjaze' chašil che yodao' blaona' chososed chosolo'ede' bene'.

²⁶ Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej.

²⁷ Na' cate' besežin postlw ca' lao bene' gwnabia' ben' nita' chosoxi'a, nach ben' nacch bꝥoz blao gože' legaque':

²⁸ —Ba bento' mandadw bi güe'le diža' che Jesúsén' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

²⁹ Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosén' clél ca' che benach.

³⁰ Le'e betwle Jesúsén' bda'lné' to le'e yag cruz, perw Dios ben' chonxéncho na' ben' gosonxen da' xozxta'ocho ca' bechis bosbane'ne' ladjo bene' guat ca'. ³¹ Na' na'a Diosén' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocane che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xtoła'chon' nach yezi'xene' chechon'. ³² Neto' nezeto' can' ben Diosén' len Jesúsén' na' choe'to' diža' chen, na' lecze Spiritw che Diosén' choen' diža' che Jesúsén' lo' yichjlažda'oton', le Diosén' ba gwsele' Spiritw chen' zoan lo' yichjlaždao' bene' chosozenag che'.

³³ Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. ³⁴ Perw gwztoa to bene' fariseo len legaque' bene' le Gamaliel. Chsed chlo'ede' bene' ley dan' bzoj da' Moisésén' na' gosapchgua bene' le' bala'an. Na' Gamalielen' gwzeche' na' bene' mandadw yesechoj postlw ca' chyo'ole šlac güe'lene' bene' ca' že'na' diža'. ³⁵ Na' gože' bene' ca' že'na':

—Bene' gualaž, cheyala' goncho xbab nac goncho len bene' quinga cont goncho da' nac güen. ³⁶ Le yosa'laže' can' goc cate' bchoj ben' le Teudas gwne' naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin ža gosot bene' le' na' besyeyaslas ben' gosaque' le' txen, gague bi gocch yesone'. ³⁷ Na' gwdechle ca tiempen' bosochele' bal bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' lecze bžin ža gosote'ne' na' bene' ca' gosaque' le' txen lecze besyeyasłase'. ³⁸ Na' da'nan' žia' le'e can' chacda' cheyala' goncho, jaseye bene' quinga, bibi gonecho legaque'. Le še chososed chosolo'ede' xbab chegacze', yeniten. ³⁹ Na' še dan' chososed chosolo'ede' naquen che Dios, bibi gac goncho cont cbi gaslasen. Cheyala' gwsaca'cho cont bi tillencho Diosen'.

⁴⁰ Na' gosazlaže' bene' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesús en' bate'tezechle. Nach bososane' legaque'. ⁴¹ Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' legaque' neche dan' chososed chosolo'ede' che Jesús en'. ⁴² Na' yogo' ža bososed bosolo'ech postlw ca' che Jesucriston' do liž bene' na' cate' chja'aque' yodao' blaona'.

Bene' ca' chesejnilaže' Criston' gosebeje' gaže bene' goson žin bixjw

6 ¹ Na' ca' tiempen' zej chanch bene' ca' chesejnilaže' Jesucriston' na' bene' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'. ² Nach postlw ca' šižinw bosyotobe' yezica'chle bene' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' bene' xtiža' Diosen' cont chisto' dan' yese'ej yesagw bene'. ³ Da'nan' bene' migw, le cuej gaže bene' lježle, bene' zoachgua Spiritw che Diosen' len legaque', bene' zjanac bene' sina' na' bene' cheson da' güen, na' le gon lo na'gaque' yeseyise' dan' yese'ej yesagw bene' ca'. ⁴ Na' neto' soateze soato' yol güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' legaque', na' gosebeje' to bene' le Esteban bene' chejnilaže'chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquía ben' bene' txen len bene' Israel. ⁶ Na' bosozoe' legaque' lao postlw ca' na' postlw ca' bosol güiže' Diosen' chegaque' na' gosexo' na'gaquen' yichj bene' ca' cont gosezi' lo ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejnilaže'ne' na' lecze zan bxož ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'. ⁹ Na' zoa to yodao' dan' chesene' Yodao' che Bene' ca' Bich Zjanaque' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bał bene' ca' gwzolao gosacyože' len Estebanna', ¹⁰ perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'. ¹¹ Nach gosego'oyele' to chop bene' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che bene' Israel ca'. Na' lecze gosene' Estebanna' gwne' diža' ya' che Diosen'. ¹² Na' bene' ca' gosacyože' che Estebanna' bosota bosone' bene' lo ciuda na' bene' gole blao che bene' Israel ca' na' bene' ca' chososed chosolo'ede' ley dan' bzoj da' Moisésen' cont gosaque' toze. Na' ja'acsese' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'. ¹³ Na' goseyiljue' bene' goso'e diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés. ¹⁴ Ba beneto' že' Jesús ben' naque' bene' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na'ocho.

¹⁵ Na' yogo' bene' ca' zjachi' gan' chesone' yela' justisen' gosene'e cho'alao Estebanna' na' besele'ede' chactiten ca cho'alao angl.

Choe' Estebanna' diža'

7 ¹ Nach ben' nacch bxož blaona' gože' Estebanna':
—¿Naquen can' chesena bene' quinga?

² Na' Estebanna' gože' legaque':

—Le'e bene' gole na' note'teze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' xoxxta'ocho Abraham cate' gwzoe' distritw Mesopotamia cate' za' šjasoe' ciuda Harán. ³ Na' Diosen' gože'ne': “Bchoj lažo' na' gwlejšyichj bene' biše' lježo' na' gwwey jaso' latje gan' gwlo'eda' le'.” ⁴ Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga. ⁵ Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'. ⁶ Nach Diosen' gwne' šjasenite' laž bene' zito' tap gayoa iz ga yesaque' esclavos

na' yesežaglaochgüe'. ⁷ Nach Diosen' lecze gože'ne': "Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga." ⁸ Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to señw dan' že' circuncisión, le' na' len bene' byo ca' zjanaque' diaža che', cont gacbia' le chesejle'e che dan' gwna Diosen'. Da'na'na' cate' golje xi'ine' Isaaquen' bzoe'be' señw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

⁹ Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gozezi' bene' nación Egipto le'. Perw Diosen' gwzoe' len Josén'. ¹⁰ Na' goclene'ne' len yogo'lol da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gocbe'ede' naque' bene' sina'. Na' da'nan' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

¹¹ Na' goc gwbin doxen Egipton' na' lecze can' goc gan' nzi' distritw Canaán na' da' xozxta'ocho ca' bi beseželde' da' yesagüe' na' besežaglaochgüe'. ¹² Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw. ¹³ Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'. ¹⁴ Na' Josén' bene' mandadw šjasexi'e xagaque' Jacoben' na' yogo'lol biše' lježe' ca', zjanaque' ca do gayonšino' bene'. ¹⁵ Can' goc gwyej Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xozxta'ocho. ¹⁶ Na' gwdechle besyeyo'e žit benat chegaquen' na' jasecuaše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwdixjuen' mechw.

¹⁷ Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'. ¹⁸ Na' ca' chac beža' rey che Egipton' na' rey coben' bi gwnezde' can' goclen Josén' nación chen'. ¹⁹ Na' rey nga gwdiljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'. ²⁰ Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'. ²¹ Perw na' bžin ža jasecho'onšaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'. ²² Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

²³ Na' choa ize da' Moisésen' cate' gwnan šjane'e bene' Israel gualaž che' ca'. ²⁴ Na' jale'ede' to bene' Egipto chchi chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. ²⁵ Bene' xbab gocde' yesacbe'e bene' gualaž che' chaclen Diosen' le' cont yosle' legaque' lo na' bene' Egipto ca', perw bi

gosacbe'ede'. ²⁶ Na' beteyo gosedil chopze bene' Israel. Na' bžin da' Moisésen' gocde' gone' cont yesenite' binlo, na' gože' legaque': "¿Bixchen' chdillen lježle le'e nacle bene' gualažze?" ²⁷ Nach ben' nap doła'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'?" ²⁸ ¿Lez chaclažo' goto' neda' can' beto' bene' Egipton' neje?" ²⁹ Na' cate' bene da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

³⁰ Na' goc choa iz zoe' na', cate' to angl bene' gwseła' Dios blo'elagüe' le' latje dašen' gala'ze Ya'a Sinaí, yo'o anglen' to lo' yi' bel chdoljen to lo' yag xis yeše'. ³¹ Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol güiž Xancho Diosen' le', che'ene': ³² "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwsize' catec bžebe', gague cheyaxjde' ne'e. ³³ Na' gož Xanchon' le': "Gwlečhj xelo'na' cont gapo' neda' bala'an, le latje gan' zechao'na' naquen chia'. ³⁴ Neda' ba ble'eda' yela' yaše' yela' zi' da' chde nación chia' Israelen' bene' že' Egipton' na' ba benda' ca chesonyaše'. Da'na'na' gaclena' legaque'. Beda na'a cont sela' le' Egipton'."

³⁵ Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che Diosen' ben' ble'e da' Moisésen' lo' yi' bel gwzoe' goclene'ne'. ³⁶ Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' choa iz. ³⁷ Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che benan' gwzenagle." ³⁸ Da' Moisésen' gwzoe' len da' xozxta'ocho ca' latje dašen', na' lo Ya'a Sinaí' to angl bene' gwseła' Diosen' gože' le' diža' da' zjansa' yela' mban, na' bzoje' dižan' par chio'.

³⁹ Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'. ⁴⁰ Na' šlac zej da' Moisésen' lo Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laochi tnez. Le ca' nac Moisésen' ben' bebej chio' Egipton', nono neze bin' ba goc che'." ⁴¹ Nach gosone' to me' go'n dao' de oro na' gosote' no beyix' gosonxene' me' daon', na' gosone' lni che bena' gosone' len ni'a na'gaque'. ⁴² Da'nan' Diosen' gwlejyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan:

Le'e bene' Israel, gague nedan' benxenle caten' betwle beyixe' latje
dašen' lao choa iz.

⁴³ Benle no da' benxenle, na' bia'le yodao' da' chacte chedobe gan'
benxenle dan' nzi' Moloc,
na' bia'le beljon' benxenle dan' nzi' Renfán.

Na' dan' ba gwlejyichjle neda', da'nan' cueja' le'e gan' zoalen' na' sela'
le'e nación zito' do gan' nzi' Babilonia.

⁴⁴ Na' šlac chesaše' latje dašen', da' xozxta'ocho ca' gosone' to yodao'
da' chacte chedobe gan' že' yej ta'a gan' nyoj ley chegaque'na'. Na'
gosenen' con can' gož Diosen' da' Moisésen' na' con can' blo'ede' le'.

⁴⁵ Nach cate' da' Josué gwche'e legaque' gan' ben Diosen' cont goseque'e
yežlio che bene' zito' ca', lecze goso'e yodao' da' chacte chedobe. Na' ne'
bosochine' yodaon' bžinten tiemp che da' rey David. ⁴⁶ Na' Diosen'
bebede' da' rey Davin', na' da' Davin' goclaže' gone' to yodao' che
Diosen', Dios ben' lecze benxen da' Jacoben' cani'te. ⁴⁷ Perw na' da' xi'ine'
Salomón benen'. ⁴⁸ Na' Diosen' ben' chnabia' doxen, bi nacho zoe' lo' yo'o
da' chon benachen', san chac can' gwna Diosen' dan' bzoj to bene' be'
xtiže'na' cani', žan:

⁴⁹ Neda' zoa' yaba chnabia',
na' guac gona' con bi chazlaža' lo yežlion'.
Na' ¿chaquele gonle to liža'na?
Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ 'Dan' bi chzenagle, dan' bi chejle'le lo' lažda'olen' nacchgualē bene'
güedenag can' gosac da' xozxta'ocho ca'. Bicze chzenagle che Spiritw che
Diosen'. ⁵² Da' xozxta'ocho ca' lecze bosochi bososaque' bene' ca' goso'e
xtiža' Diosen' cani', na' gosote' legaque' caten' goso'e diža' can' sela'
Diosen' Xi'ine' ben' nac bene' güen juisyw. Na' cate' bide', le'e bdelne' lo
na' bene' ca' gosote'ne' na' le'e naple doła' dan' gosote'nen'. ⁵³ La'czla'
nombia'le ley dan' bosonežjw angl ca' da' Moisésen', bi chzenagle chen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxejte laye'.
⁵⁵ Perw na' Esteban' gwzoachgua Spiritw che Diosen' len le', bcos lagüen'
gwne'e yabale na' ble'ede' chac to be'ni' gual gan' zoa Diosen' na' ble'ede'
zecha Jesúsēn' cuit Diosen' chnabi'e txen len le'. ⁵⁶ Nach Estebanna'
gwne':

—Le na'šc nla'xeje yaban' na' nla' Jesúsēn' ben' golje' benach zeche'
cuit Diosen' chnabi'e txen len le'.

⁵⁷ Nach bene' ca' zjanžaguen' leca beseloque' na' bososya'adie' na'
bososejyw naggaque'na' na' to ši'ize ja'acsese' gan' ze Estebanna'. ⁵⁸ Nach
gosebeje' Estebanna' cho'a yež na' bosožie'ne' yej. Na' bene' ca' bosožie'
le' yejen' bosonežjue' xagaque' da' zjandobe' to bene' xcuide' bene' le

Saulo cont gapen'. ⁵⁹ Na' šlac chosožie' Estebanna' yej, Esteban' bol güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo yon' na' gwne' zižje, gwne':

—Xana' bi gono' cuent xtoła' bene' quinga dan' chesote' neda'.

Na' beyož gwne' ca', gote'.

Saulo bchi bsaque' bene' chesonxen Jesucriston'

8 ¹⁻² Na' ca nac Saulon', gwyazlaže' dan' gosote' da' Estebanna'. Na' bene' ca' chesejnilaže' Jesucriston' ciuda Jerusalenna' jasecuaše' da' Estebanna', na' gosebežchgüe' che'. Na' gwde gosote' da' Estebanna' gosezolagüe' bosochi bososaque' bene' ca' chesedop chesežag chesonxene' Jesucriston' Jerusalenna', na' yogo' bene' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. ³ Na' Saulon' gwzolaküe' cheje' liž to to bene' ca' chesonxen Jesucriston' chjaxobe' no bene' byo na' no no'ole cont chche'e legaque' ližya.

Bene' ciuda Samaria gosende' diža' güen che Jesucriston'

⁴ Na' bene' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. ⁵ Na' ben' le Felipe bžine' ciuda Samarian' na' be'e diža' che Jesucriston'. ⁶ Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'. ⁷ Bebeje' da' xigüe' ca' zjajo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e. ⁸ Na' besyebchgüe bene' ca' že' ciudan'.

⁹ Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e legaque' gože'ne' naque' bene' zaque'. ¹⁰ Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

¹¹ Zan iz bosozenague' che', le gwziye'e legaque' len yela' guaža' che'na'. ¹² Perw cate' Felipen' gwduxjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole. ¹³ Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

¹⁴ Na' postlw ca' nite' ciuda Jerusalenna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. ¹⁵⁻¹⁶ Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca

hora' bina' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsén'. ¹⁷ Nach gosexoa na' postlw ca' yichjgaque' cont gwzoa Spiriton' lo' yichjlažda'ogaquen'.

¹⁸ Na' ble'e Simón can' cheson postlw ca' chesexoa ne'e yichj bene' cont chzoa Spiriton' len legaque', na' bšabde' legaque' mechw. ¹⁹ Gože' legaque':

—Le gon cont neda' gac xoa na'a yichj note'teze bene' na' soa Spiriton' len legaque' can' chon le'e.

²⁰ Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' choṇ Diosen'. ²¹ Bi zaco' gono' da' nga chonto', le yichjlažda'oguo' naquen mal lao Diosen'. ²² Da' cheyała' gono', betinje da' malen' chono' na' gwṇab goclen lao Diosen' cont yezi'xene' chio' ca' nac xbabén' yo'o lo' yichjlažda'oguo'. ²³ Nacbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

²⁴ Nach Simónna' boži'e xtižen' gože' le':

—Le nab goclen lao Xancho' cont ne to da' mal dan' baḥ gwnao' nga bi gac chia'.

²⁵ Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

Felipe na' bene' Etiopía

²⁶ Nach Xancho Diosen' gwsele' to angl bene' gože' Felipe:

—Gweyj gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeje' Jerusalénna' jenxene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace. ²⁸ Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'. ²⁹ Nach Spiritw che Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten' na' cate' bžine' gala'ze bende' chlab ben' libr dan' bzoj da' Isaíasen'. Nach gože'ne':

—¿Chejni'ido' dan' chlabo'na'?

³¹ Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob be_{ne}' cont gote'ba',
na' ca to xila' dao' be bi chosya'a cate' chšibe'ba',
can' bene', bibi gw_{ne}' caten' gosezi' gosebague'ne'.

³³ Na' gosone' le' ca to be_{ne}' bibi zaca'.

Na' bi gosone' yela' justis che' ca cheya_{la}' gaquen.

Na' nono diaža che' nita', le goseque'e yela' mban che' lo yežlio nga.

³⁴ Nach be_{ne}' Etiopían' gože' Felipen':

—Benšca goclen gwna neda' no chen' ža ben' bzoj Xtiža' Diosen' ca',
¿che cuinen' že' ca' o še che be_{ne}' yoble?

³⁵ Nach Felipen' gwzomagüe' bzejni'ide' bi zejen dan' chlab be_{ne}'
Etiopían', gože' le' diža' güen che Jesúsén'. ³⁶ Na' ca' chac, besežine' ga
žia nis, nach bena' gože' Felipen':

—Nga žia nis, ¿cibi gac soa' nisen' na'a?

³⁷ Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

³⁸ Nach bene' mandadw bcueze' carreten' na' betj Felipen' len be_{ne}'
Etiopían' jasežo'e lo' nisen' cont Felipen' bzoe'ne' nis. ³⁹ Na' cate'
besyechoje' lo' nisen', Spiritw che Diosen' la' beche'eten Felipen' ga
yoble, na' bich ble'e be_{ne}' Etiopían' le'. Na' mbalaz beza' ben' beyo'e lo'
carreten'. ⁴⁰ Nach Felipen' bžine' yež dan' nzi' Azoto na' gwzomagüe'
gwdixjue'ede' diža' güen che Jesucriston' to to yež da' zjachi' ga_{la}'ze ga
gwdie' bžinte' Cesarean'.

Diosen' bocobe' yichjlaždao' Saulon'

(Hch. 22:6-16; 26:12-18)

9 ¹ Na' Saulon' con chdacze' cho'e diža' can' chaclaže' gote' be_{ne}'
chesejnilaže' Xancho Jesucriston' na' chdacze' cheyiljwlaže' nacle
gone' gote' legaque'. Na' da'nan' Saulon' gwyeje' lao b_xoz blao che be_{ne}'
Israelen', ² na' gwnabde'ne' gwzoje' to yiš da' goxe' yosolab be_{ne}' že' to to
yodao' nita' ciuda Damasco cont yesenezde' nape' yela' gwnabia' sene'
be_{ne}' ca' ba chesejnilaže' Jesucriston' na' gwcheje' legaque' cont che'e
legaque' ciuda Jerusalénna' la'czla' be_{ne}' byo o la' no'ole. ³ Cate' beyož
bnežjue'ne' yišen' gwlo'e nez, na' ba zoa žine' ciuda Damascon' cate'
zejzenez to be'ni' da' za' yaban' gwyechjen le'. ⁴ Na' gwbiže' lo' yon'. Na'
bende' che' to be_{ne}' le':

—Saulo, ¿bixchen' chchi chsaco' neda'?

⁵ Na' Saulon' boži'e xtižen' gože' le':

—¿No le' be_{ne}'?

Nach bena' gože'ne':

—Nedan' Jesús ben' ch̄chi chsaco'. Na' dan' chgue'edo' neda', chone zi' cuino' can' chac̄ che to gōn̄ be chlibe lo ya dan' zoa lo carroš̄ cheba'.

⁶ Na' do chaž̄ chžebze' gože' le':

—Xana' Jesús, ¿bin' chaclažo' gona'?

Nach Xanchon' gože'ne':

—Beyas na' gweyey ciuda Damascon' na' zoa to bene' ye'e le' da' cheyala' gono'.

⁷ Na' bene' ca' zja'aclen Saulon' benit bechōl gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'. ⁸ Nach beyas Saulon', perw cate' bexa' lagüen' con bich ble'ede'. Nach bene' ca' nžague'na' gosoxe' ne'e goseche'ene' Damascon'. ⁹ Na' šone ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xanchon' gože'ne':

—Gwzoža' na' gweyey liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba chōl güiže' neda'.

¹² Na' ba bena' cont ble'edagüede' le' gwyo'o gan' zoe'na' na' gwxōa nao' yejlagüe'na' cont ye'le'ede'.

¹³ Nach Anaíasen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo nao'. ¹⁴ Na' chesene' ze'e nga noxe' yiš̄ che b̄xoz gwnabia' ca' cont sene' yogo'lōl neto' chejnilaže'to' le'.

¹⁵ Nach Xancho Jesucriston' gože' Ananíasen':

—Gweyey, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len reȳ chegaque' ca', na' lente le'e nacle bene' Israel. ¹⁶ Na' gwlo'eda'ne' ca' nac da' yaše' da' zi' da' gac̄ che' dan' gwzenague' chia'.

¹⁷ Nach Ananíasen' gweyeje' gan' zoa Saulon' na' gwyo'e lo' yo'ona' na' gwxōa ne'e yejlao Saulon', gože'ne':

—Bene' migw Saulo, Xancho Jesús en' ben' blo'elagüe' le' tnez gan' za'ona' ba gwsele' neda' zedena'a le' cont ye'le'edo' na' soa Spiritw̄ che Diosen' len le'.

¹⁸ Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gweyeje' gan' gwzoe' nisen'. ¹⁹ Ca beyoža' gwdagüe' na' beyaclaže'. Na' bega'ane' Damascon' yeto chop̄ ža len bene' ca' chesejnilaže' Xanchon'.

Saulon' be'e xtiža' Diosen' Damascon'

²⁰ Na' la' gwzolaote gwyeje' to to yodao' be'e diža' che Jesúsén', gwne' len' naque' Xi'in Diosen'. ²¹ Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda chonit cholane' bene' ca' chesejnilaže' Jesúsén' ciuda Jerusalénna'? na' ¿gague da' na' czen' bide' nga na'a cont gwcheje' bene' ca' na' šjasane' legaque' lao bxoz gwnabia' ca'?

²² Na' Saulon' tža tža Diosen' goclene'ne' cont be'e diža' che Jesúsén' tcho'a, gwne' Jesúsén' naque' ben' gwsela' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosacbe'ede' dan' che'e legaque' naquen da' li.

Saulon' bi goque' lo na' bene' ca' chesegue'ede' le'

²³ Na' cate' ba goc sša choelen Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. ²⁴ Na' gosenite' chesape' to to cho'a puert che ze'ena' dan' nychj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'. ²⁵ Na' bene' ca' chesejnilaže' Jesucriston' besyeletje'ne' le'e ze'e dan' nychj ciudan' šeže'le besyegüe'ene' to lo' žome cont goc bechoje' lo ciudan'.

Gwey Saulon' Jerusalénna'

²⁶ Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'.

²⁷ Nach Bernabé gwche'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsén' šlac ngüe'e nez zeje' Damascon' na' can' goc Xanchon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsén' Damascon' sin cbi bžebe'. ²⁸ Nach postlw ca' gosejle'e can' goc che Saulon', na' gwzolao gwdalen Saulon' bene' ca' chesejnilaže' Jesucriston' Jerusalénna'. ²⁹ Na' sin cbi bi chaž chžebe' gwzolağüe' chzejni'ide' bene' Israel ca' diža' che Xancho Jesúsén', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'. ³⁰ Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'chache' gosejnilaže' Xancho Jesúsén' na' bosozenague' che' do yichj do laže'gaque'. Na'

Spiritw che Diosen' benen cont gosacchach laže'gaque' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyaje' jane'e bene' ca' že' yež dan' nzi' Lida. ³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'. ³⁴ Nach gož Pedroa' le':
—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. ³⁵ Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr chegaque' cont gosejnilaže' Xancho Jesucriston'.

Dorcas bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'. ³⁷ Perw na' gocšene Dorcasen' na' gottechgüe', na' bosoguazje'ne' na' gosexoe'ne' to lo' quart da' zoa yichj yo'o cha'te. ³⁸ Na' gala'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope bene' jasata'yoede' Pedroa' gose'ene':
—Benšca goclen yo'o len neto' netec na'a.

³⁹ Na' Pedroa' la' gwza'te' gwyaje' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis. ⁴⁰ Nach Pedroa' bešaše' yogo'lol bene' ca' chyo'ole na' bzoa xibe' bol güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'. ⁴¹ Nach Pedroa' bexue' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo na' Diosen' na' blo'ede' legaque' ba beban Dorcasen'. ⁴² Na' yogo'lol bene' Jopen' gosende' can' goquen', na' bene' zanch gosejnilaže' Xancho Jesucriston'. ⁴³ Na' Pedroa' bega'ane' Jopen' zan ža, gwzoe' liž to bene' le' Simón, bene' chonšagüe' yid.

Pedroa' na' Cornelio

10 ¹ Na' ciuda Cesareana' zoa to bene' le' Cornelio, naque' xan to gayoa soldadw, na' bosozoa la soldadw che' ca' Bene' Italia. ² La'czla' Cornelion' cbi naque' bene' Israel, benxene' Diosen', na' lecze ca' goson bene' lo' yo'o che', chesozoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze'

chol̄ güiže' Diosen'. ³ Na' goc che', to ža do cheda šone ble'edagüede' to angl bene' gwsela' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' chol̄ güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'. ⁵ Da' nga gono' na'a, gwsela' bene' šjasexi'e to bene' zoa ciuda Jopen' bene' le Simón na' lecze le' Pedro. ⁶ Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gono'.

⁷ Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' lecze chonxene' Diosen'. ⁸ Na' Cornelion' bzejni'ide' legaque' yogo'lołte can' goquen' nach gwsele' legaque' Jopen'. Na' gosegüe'e nez zja'aque'.

⁹ Na' beteyo gala'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiž cont jel̄ güiže' Diosen'. ¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. ¹² Na' lo'enña' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba. ¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bach gwnia' gago' bi nao' be zban zjanacba'.

¹⁶ Da' gwyon ni'a gož Diosen' le' ca' nach la' begüete lachen' le'e yaban'. ¹⁷ Šlac chacžejlaže' Pedroa' bi zejen dan' ble'edagüeden', besežin bene' ca' gwsela' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. ¹⁸ Nach zižje gosenabe' še le na' zoa to bene' lecze le Simón Pedro. ¹⁹ Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' chesyeyiljue' le'. ²⁰ Gwzoža' na' beyetj cont šejleno' legaque', na' bi gacžejlažo' la'czla' bi zjanaque' bene' Israel, le neda' gwsela' legaque'.

²¹ Nach Pedroa' beyetje' jašague' bene' ca' gwsela' Cornelion', nach gože' legaque':

—Nga zoa', nedan' Simón Pedro. ¿Bichen' cheyiljwle neda'?

²² Nach gose' bene' ca' le':

—To xan soldadw bene' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lol bene' Israel ca' cheso'e xtiže' ca bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwyejlene' legaque' na' gwche'e to chope bene' Jopen' bene' chesejnilaže' Jesucriston'.

²⁴ Na' beteyo cate' besežine' ciuda Cesarean', Cornelion' bač ntobe' biše' lježe' len xmigüe' ba zjažie' liže'na' chesebeze' le'. ²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. ²⁶ Na' Pedroa' bsože'e le', gože'ne':

—Bezoža'. Lecze benač neda'.

²⁷ Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'. ²⁸ Nach gože' legaque':

—Nezeczele ley che neto' bene' Israel žan bi cheyała' šo'to' liž bene' bi zjanaque' bene' Israel, na' žan bi cheyała' gonto' txen len le'e bi nacle bene' Israel. Perw bač bzejni'i Diosen' neda' ne to bene' cbi cheyała' gona' xbab che' naque' bene' zban par šo'a liže'na'. ²⁹ Da'nan' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' čbixchen' gwnio' neda'?

³⁰ Nach Cornelion' gože'ne':

—Na'a chac tap ža do cheda šone' zoa' sin cbibi nagua', na' chol güiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'. ³¹ Nach gože' neda': “Cornelio, ca nac da' gwnabdo' Diosen', bač bzenague' chen, na' nezde' chnežjo' da' chyažj da' chchine' bene' yaše'. ³² Na' na'a gwseła' to chope bene' šjasexi'e to bene' zoa' ciuda Jopen' bene' le' Simón Pedro. Zoe' liž to bene' lecze le' Simón, to bene' chonšagüe' yid. Liž ben' chonšagüe' yiden' zoan gała'ze cho'a nisdao'. Na' cate' la' Pedroa' ližo' nga nach güe'lene' le' diža'.” ³³ Nach la' gwseła'tia' bene' ca' bedesexi'e le', na' choxcclenteco' bač bido'. Na' nezcz'e Diosen' yogo'to' nita'to' nga gwzenagto' yogo'lolte' dan' ba ben Diosen' mandadw nao'.

Pedroa' be'e diža' liž Cornelion'

³⁴ Nach Pedroa' gwzolagüe' be'e dižan' gwne':

—Da' li bač nezda' nono nla' bene' nacho nzoa Diosen' le' to šla'aze. ³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'. ³⁶ Diosen' gwduxjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'lol bene'. ³⁷ Nezele dan' ba goc doxen distritw Judean' dan' gwzolao distritw Galilean' gwde gwduxjue'e da' Juanna' xtiža' Diosen' na' bzoe' bene' nis. ³⁸ Nezele Diosen' gwleje' Jesús'en' ben' naque' bene' yež Nazaret cont chaclene' chio' benač, na'

be'ene' Spiritw che'na' na' yela' chnabia'. Na' gwda Jesús'en' bene' da' güen na' beyone' yogo'loł bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. ³⁹ Neto' nezeto' na' choe'to' diža' che yogo' da' güen da' ben Jesús'en' na' dan' bsed blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to' le'e yag cruz. ⁴⁰ Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesús'en' blo'elagüe' neto'. ⁴¹ Gague yogo'loł bene' besele'ede' Jesús'en' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwlento'ne' txen gwde bebane' ladjo bene' guat ca'. ⁴² Jesús'en' bene' mandadw chixjue'eto' benachen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. ⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtoła'gaque'na'.

**Spiritw che Diosen' gwyo'on lo' yichjlaždao' bal bene' bi
zjanaque' bene' Israel**

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. ⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel. ⁴⁶ Gosacbe'ede' gwyo'o Spiritw che Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'. ⁴⁷ Nach Pedroa' gože' bene' Israel ca' nžaguen':

—Bibi de da' gwžon yesezoa bene' quinga nisen', le nacbia' ba zoa Spiritw che Diosen' len legaque' can' zolan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

Pedroa' gože' bene' Jerusalén ca' can' goquen'

11 ¹ Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'. ² Nach Pedroa' beze'e gweyche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosenelagüe' che', ³ gose'ene':

—¿Bixchen' ba gweyjo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

⁴ Nach Pedroa' gwzomagüe' be'lene' legaque' diža' tcho'a yogo' dan' goc che', gože' legaque':

⁵ —Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'. ⁶ Na' gwña'yana' na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' bał be ca' zjanacba' be znia. ⁷ Na' benda' gož Diosen' neda': "Gwyas Pedro, na' betw be ca' gwdagw." ⁸ Nach boži'an gwnia': "Xana', bi gagua' legacba'. Ne tni'aze bina' gagua' be zban zjanac ca', le bi de lsens len ley cheto'na' gagwto' ben' zjanac ca'." ⁹ Na' da' gwchop ni'a Diosen' gwne': "Be bach gwnia' gago' bi nao' zjanacba' be zban." ¹⁰ Šon ni'a gože' neda' ca' nach begüe lachen' le'e yaban'. ¹¹ Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'. ¹² Na' Spiritw che Diosen' bzejni'in neda' cheyala' ša'alena' legaque' sin cbi gacžejlaža', na' gwchi'a bene' lježcho quinga xop, gwyejto' Cesarean' bžinto' liž ben' le Cornelio na' gwyo'oto' ližen'. ¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwseła' bene' šja'ac ciuda Jopen' šjasexi'e to bene' le Simón Pedro. ¹⁴ Bena' ye'e le' len bene' lo' yo'o chio' nac gonle cont gata yela' mban chele toli tocanē." ¹⁵ Nach cate' gwzolagua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'. ¹⁶ Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e." ¹⁷ Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' inox naca' neda' gwžona' gon Diosen' dan' chaclaže' gone'?

¹⁸ Na' ca beyož bosozenague' xtiža' Pedroa' bich bi gosene' che Pedroa' dan' gwyeye' liž Cornelion', san goso'e yela' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetinjde' xtola'gaque'na' cont gwnežjue' yela' mban chegaque' toli tocan.

Bene' ca' chesonxen Jesucriston' ciuda Antioquía gan' mbane Siria

¹⁹ Na' gwde gosot bene' Israel ca' Estebanna', gosezolagüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosaslase'. Bale' ja'aque' do distritw Fenicia, na' yež ca' zjachi' to lo yežlio da' žia lo' nisdaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con bene' zjanac bene' Israel xtiža' Jesúsén', bi bososed bosolo'eden' bene' cbi zjanaque' bene' Israel. ²⁰ Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len

bene' ca' cbi zjanaque' bene' Israel. ²¹ Na' Xanchon' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xanchon'.

²² Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gwyeje' Antioquían'. ²³ Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebecgüede'. Nach gwneyoede' legaque' nita'chache' yosozenague' che Xanchon' do yichj do laže'.

²⁴ Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'. ²⁶ Na' gosenite' Antioquían' tgüüz gosone' txen len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

²⁷ Šlac nita' Bernabén' na' Saulon' lo ciuda Antioquían', besežin bal bene' Jerusalén ben' chosozende' bene' bi dan' ba gož Diosen' legaque'.

²⁸ Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. ²⁹ Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. ³⁰ Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalénna'.

Gosote' Jacobon' na' goseyixjue' Pedroa' ližya

12 ¹ Na' ca tiempa' rey Herodes bchi bsaque' bal bene' ca' chesonxene' Jesucriston'. ² Nach bene' mandadw gosote' Jacobo bene' biše' Juanna' len spada. ³ Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen. ⁴ Nach Herodesen' gwduxjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudan'. ⁵ Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'.

⁷ Cate'cze zejzenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. ⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'. ¹⁰ Beyož besyedie' chop cuen gan' nita' soldadw ca' chesape' ližyan', besyežine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'. ¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo na' Herodesen' na' bosle' neda' lo yogo' da' ca' chesaque bene' Israel gualaz chia' ca' yesonde' neda'.

¹² Na' ne' chonte Pedroa' xbaden' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag bene' zan chosol güiže' Diosen'. ¹³ Nach bsiže' cho'a puert zaguanna' na' la' bchojte to bi' no'ole le Rode jana'be' non'. ¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyejsesbe' gan' že' bene' ca' jayežbe' legaque' ba bla' Pedroa'. ¹⁵ Nach gose'ebe':

—¿Gague chactonto'na'?

Perw lebe' nezcebe' le'na'. Nach legaque' gose'ebe' naquen bxin che'.

¹⁶ Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'. ¹⁷ Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

¹⁸ Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

¹⁹ Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson

bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

²⁰ Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' besejažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjasenabe' yesenite' binlo len le'. ²¹ Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'. ²² Nach bene' ca' bososye'e, gosene':

—Diosen' choe' diža', gague benachen'.

²³ Na' lo hora' gwseła' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

²⁴ Perw ca' nac xtiža' Xancho Jesucriston' gos gwlałjchguan.

²⁵ Na' Bernabén' len Saulon' beyož gosone' yogo' da' cheyala' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to bene' le Juan na' lecze lie' Marcos.

Bernabén' na' Saulon' ja'aque' jasedixjue'ede' xtiža' Jesucriston' yež zito'

13 ¹ Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaque', na' zjalén bene' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea. ² Na' to ža bene' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'. ³ Nach bene' ca' bosol güižche' Diosen' sin cbi zjane'ej zjanagüe', nach gosexoa na'gaque' yichj Saulon' len yichj Bernabén', gosone' ca' cont gosegüe'e xšin Diosen' lo na'gaque'. Gwdena' bosose'e legaque'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwsełan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na'

Chipren' naquen to yežlio dao' dan' chi' lo' nesdaon'. ⁵ Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che bene' Israel ca'. Na' zjanche'e Juan ben' lecze le Marcos cont chaclene' legaque'. ⁶ Na' ca' gosaše' gosedie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. ⁷ Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'. ⁸ Na' Barjesúsen' lecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'. ⁹ Na' Spiritw che Diosen' zoachguan len Saulon' ben' lecze le Pablo, nach bcos lagüen' gwña'chgüe' Elimasen'. ¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bichen' cbi chbezo' chžono' yosozenag bene' diža' li che Xanto' Diosen'? ¹¹ Da'nan' Xanto' Diosen' gone' castigw chio' na' cholo' to tiemp, bi gac le'edo' gwbiža'.

Nach la' gwcholtie', gwde ca to bejw lo yejlagüe'na', nach gwzologüe' chgan chtobe' cheyiljue' no goxe' ne'e cont cue' nez. ¹² Gobernadoren' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalénna'. ¹⁴ Na' Pablon' len Bernabén' gosa'aque' yež Perge na' besežine' ciuda Antioquían' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. ¹⁵ Na' ca' beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac nalen na'a.

¹⁶ Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'. ¹⁷ Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'. ¹⁸ Na' Diosen' gwdape' yela' chxenlaže' choa iz len da' xozxta'ocho

ca' šlac gosaše' latje dašen'. ¹⁹ Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio chegaquen'. ²⁰ Nach gwde na' Diosen' gwleje' tgieje tgieje juez cont gosenabi'e nación Israelen' lao tap gayoa yogašje iz bžinte tiemp che da' Samuel ben' be'e xtiža' Diosen' cani'. ²¹ Nach tiemp che da' Samuelen' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te. ²² Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaí nga, le chaclaže' chone' can' chazlažan' na' chzenague' bite'tez da' chapa'ne'." ²³ Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocanē can' gwne' cani'. ²⁴ Na' cate' bina' solao Jesúsēn' gwsed gwlo'ede' bene', da' Juanna' gwduxjue'ede' len yogo' bene' Israel gualaž chechon' cheyala' yesyētinjde' xto'la'gaque' na' yesezoe' nis. ²⁵ Na' cate' beyož ben Juanna' dan' yo'o lo ne'e gone', nach gože' bene' ca' chosozenag che': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

²⁶ 'Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan gone' chio' yela' mban toli tocanē naquen par chio'.

²⁷ Bene' ciuda Jerusalén ca' len bene' gwnabia' chegaque' ca' bi gosejli'e gwsela' Diosen' Jesúsēn', na' bi gosejni'ide' da' ca' zjanyoj che' le'e libr dan' bosozoj bene' ca' goso'e xtiža' Diosen' cani' la'czla' chosolaben' lo' yodaon' yogo' ža che Dios. Na' dan' bi gosejni'ide', da'nan' gosechoglagüen' yesote' Jesúsēn', nach goc can' nyoj che'. ²⁸ Na' la'czla' gosenēzde' bibi da' mal non Jesúsēn' cont yesote' le', gosenabde' Pilaton' gone' mandadw yesot soldadw che' ca' le'. ²⁹ Na' goc che Jesúsēn' yogo' dan' nyoj che' le'e Xtiža' Dios dan' bosozoj bene' ca' gosenita' cani'. Na' beyož gote'na' nach besežin bene' besyeletje' cuerp che'na' le'e yag cruzen' na' bosocuaše'ne'. ³⁰ Na' gwdena' Diosen' bechis bosbane' le' ladjo bene' guata'. ³¹ Na' bene' ca' zjanaque' Jesúsēn' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsēn' yezan ža gwde bebane' ladjo bene' guata', na' legaque' cheso'e diža' chen' len yezica'chle bene' Israel.

³² Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'. ³³ Ba benen' len chio' naccho xi'in diaža che da' bene' ca', dan' bosbane' Jesúsēn' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'." ³⁴ Na' Diosen' lecze bene' cont nyojen ga yoble che' dan' bosbane' le' ladjo bene'

guaten' na' gwbat gožo' cuerp chen', žan: "Gona' güen len le' dolol can' goša' rey Davin'." ³⁵ Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'." ³⁶ Nezecho da' rey Davin' gwnabi'e bene' Israel ca' gwnita' ca' tiemp chen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp chen'. ³⁷ Perw na' Diosen' bosbane' Jesúsén' ben' nyoj Xtižen' žan ca', na' bi gožo' cuerp chen'. ³⁸ Na' cheyala' nezele bene' migw, Jesúsén' ben' choa' diža' che', chezi'xene' xtola' note'tez bene' chejnilaže'ne'. ³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésén', perw note'tezcho chejnilaže'cho Jesúsén', len' ba cheyone' chio' bene' güen. ⁴⁰ Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

⁴¹ Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le.

Neda' Dios gona' to da' yebanele šlac mbanle,
to da' bi šejle'le la'czla' še no chixjue'e le'e can' gaca'.

⁴² Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmana' yeto cont yosozejni'ide' legaque' yelate' che da' ca' ba bosozejni'ide'. ⁴³ Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' gosene'yoede' legaque' cont nita'che' yesejnilaže'che' Diosen' ben' chaclen legaque'.

⁴⁴ Na' cate' bežag xmana' ža che Dios yogo'lolcze bene' lo' ciudan' besežag cont bosozenague' xtiža' Diosen'. ⁴⁵ Na' gwnita' bene' Israel bene' bi gosejle' che Jesúsén', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosnelagüe' che' na' gosezi'diže' le'. ⁴⁶ Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž cheto'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli tocanē. Da'nan' na'a gwzejni'ito' bene' ca' bi zjanac bene' Israel. ⁴⁷ Gonto' ca' neche Xanto' Diosen' bach bene' mandadw gonton', le nyojen žan:

Bach nzoa' le'e cont co'ole be'ni' chian' lo' yichjlaždao' bene' ca' bi zjanac bene' Israel,

cont bene' ca' že' doxen yežlion' yesacbe'ede' guac nitlao xtola'gaque'.

⁴⁸ Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban chegaque' toli tocanē, legaque' gosejle'e xtiža' Diosen' dan' be' Pablon' len Bernabén'. ⁴⁹ Can' goc bene' ca' že' doxen distritwna' gosende' xtiža' Xancho Jesucriston'. ⁵⁰ Perw bal bene' Israelen' goso'e diža' len no'ol blao ca' gosonxen Diosen' na' len

bene' gwnabia' blao ca' lo ciudan', na' bosoše'e xbab chegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'. ⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebelj legaque' malen' chesone' chosolague' legaque'. Nach jaya'aque' yež Iconio. ⁵² Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw che Diosen' gwzoachguan len legaque'.

Pablon' len Bernabén' besežine' yež Iconio

14 ¹ Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e che'. ² Perw na' gwnita' bene' Israel ca' bene' bi gosejle'e che Jesucriston', na' legaque' gosenelagüe' che bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezologüe' besegue'ede' Pablon' len Bernabén'. ³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xanchon' blo'e le diža' lin' cheso'e chesene' Diosen' chacde' benachen', le be'e legaque' yela' guac cont gosone' da' zaca' yebanecho cont gosaclene' bene'. ⁴ Na' bene' ca' že' lo yežen' gosaque' chople, bale' gosede'e bene' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'. ⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis chegaque' cont yesone' contr Pablon' len Bernabén' na' yosochele' legaque' yej. ⁶ Perw cate' gwneze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia. ⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to bene' golje' nxinj ni'e ca', cate' gocte' bidao' bi goc se'e. ⁹ Con chi'teze' chzenague' choe' Pablon' dižan'. Nach Pablon' gwne'e le' na' gocbe'ede' bena' chejle'e Diosen' nape' yela' guac cont yeyone' ni'en'. ¹⁰ Nach Pablon' bol güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'. ¹¹ Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' benach.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'. ¹³ Na' yodao' gan' chesonxene' xangaque' Júpiteren' zoan cho'a

yež. Na' b̄xoz che Júpiteren' jaxi'e go'n be ba zjanone' xdan zjanžie' legacba' corona yej. Nach b̄xozā' gw̄che'e beñe' zan cho'a yežen' gan' zoa puert che ze'e dan' nyečhj yežen' na' goclaže' yesote' go'nen' yesonxene' postlw ca'. ¹⁴ Na' Pablon' len Bernabén' cate' gosacbe'ede' can' yeson beñe' ca', gosečeza' xagaque' dan' bi gosaclaže' yesonxen beñe' ca' legaque'. Nach gosedie' gachol beñe' ca' gose'e legaque' zižje:

¹⁵ —Bene', ¿bixchen' chonle ca'? Lecz benach neto'. Za'to' cont chyixjue'eto' le'e cheyała' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocanē. Le' bene' yaban', yežlion', nisdaon', benach, be ca' chesaš na' bite'tezechle da' chle'echo le'e yaban', lo yežlion' na' lo' nis. ¹⁶ Cani' Diosen' bi bžone' gon benachen' bite'tez da' mal da' žan yesone'. ¹⁷ Perw zoacze' chone' da' güen len yogo' benach cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

¹⁸ Na' la'czla' Pablon' len Bernabén' gosene' yogo' da' ca', canē gosoede' bosožone' yesot beñe' Litra ca' go'nna' yesonxene' legaque'.

¹⁹ Nach besežin bal beñe' Israel beñe' nita' yež Iconio na' ciuda Antioquía dan' chi' distritw Pisidian', na' beñe' ca' gosego'oyele' beñe' Litra ca' cont gosaque'ne' txen bosochele' Pablon' yej. Na' cate' gosone' xbab bach gote' nach gosexobe' le' cho'a yeža' na' bosyocua'ane' le' na'. ²⁰ Perw na' beñe' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

²¹ Nach cate' besežine' Derben' bosozende' beñe' ca' že' na' diža' güen che Jesucriston', na' beñe' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. ²² Na' to to yež gan' ja'aque' gosone' chach laže' beñe' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. ²³ Na' to to yež ga besyedie' gosebeje' beñe' yosogüia yesene'e yezica'chle beñe' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' beñe' ca' ba chesejnlaže' le'.

Pablon' len Bernabén' jaya'aque' Antioquía gan' mbane distritw Siria

²⁴ Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. ²⁵ Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia. ²⁶ Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le' beñe' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont

yosozejni'ide' bene' xtiže'na'. Na' na'a besyežine' ba beyož gosone' dan' gosego'o bene' ca' lo na'gaque' yesone'. ²⁷ Na' bosyotobe' bene' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzolao chesejnilaže' Jesucriston'. ²⁸ Na' besyega'ane' Antioquían' sša len bene' ca' chesonxene' Jesucriston'.

Gosone' yela' güexi'a len bene' ca' že' ciuda Jerusalénna'

15 ¹ Na' šlac Pablon' len Bernabén' ne' nite' ciuda Antioquían' besežin to chope bene' za'ac distritw Judean' na' gosezolagüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban chegaque' toli tocane. ² Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosechoglagüen' šja'ac to chope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

³ Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebechgüede' gosende' dižan'.

⁴ Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'. ⁵ Nach nita' to chope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyała' soe' señw dan' nzi circuncisión na' cheyała' gone' can' ža ley dan' bzoj da' Moisésen'.

⁶ Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. ⁷ Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'. ⁸ Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda'ochon'. ⁹ Toz ca' chon Diosen' len chio'

na' len legaque', note'tezcho ba beya' beyibe' lažda'ochon' dan' chejle'cho che Jesúcriston'. ¹⁰ Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' ža diža' gol cheto' ca'. ¹¹ Bi cheyala' goncho ca', le nezecho note'tez naccho, Xancho Jesúsen' chone' yela' mban checho toli tocane dan' chacde' chio', gague neche dan' choncho can' ža ley che Moisés.

¹² Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. ¹³ Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. ¹⁴ Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' bale' cont zjanaque' lo ne'e. ¹⁵ Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

¹⁶ Tena' yida' da' yoble na' gona' cont nabia' xi'in diaža che da' rey David,

la'czla' na'a nono xi'in diaža che' chnabia',
na' gona' cont soa toe' da' yoble nabi'e.

¹⁷ Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' nación guac yosol güiže' neda'.

¹⁸ Can' gwna Xancho Diosen' cani'te,
bene' cont goseneze bene' can' gaquen'.

¹⁹ Na' lagüe nyoj Xtižen' žan ca', chacda' neda' bi cheyala' gonecho zed bene' ca' bi zjanac bene' Israel bene' ba chesebejyichje' costumbr gole chegaque' na' chesonxene' Diosen'. ²⁰ Con gwzoycho ye'gacchone' bi yesone' txen len bi dan' cheson bene' dan' chesene' naquen che l gua'a lsaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesagüe' be chesote' chosošoque' do lba'ba', neca yesagüe' chen che beyixe'. ²¹ Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža che Dios.

²² Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj chope bene' lježe' šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'.

²³ Na' bosozoje' to cart da' gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. ²⁴ Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyała' soale señw dan' že' circuncisión na' cheyała' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'. ²⁵ Da'nán' gwzoato' txen bento' yela' güexi'a gwlejšto' chope bene' quinga chselá'to' gan' zoalen', txen len postlw Pablon' na' len Bernabén', bene' ca' chaquehgüeto'. ²⁶ Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. ²⁷ Na' chselá'to' Judasen' len Silasen' cont yosozejni'ide' le'e diža' cho'a yogo' dan' bzojšto' le'e cart nga. ²⁸ Chazlaže'to' can' bzejni'i Spiritw che Diosen' neto', na' da'nán' bi gonto' mandadw bichle da' zdebe gonle san da' quinga chaqueto' chonen byen cbi gonlen. ²⁹ Bi gagwle yela' guagw dan' ba bosožie' lo l gua'a lsacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojšto' le'e cart nga. Diosen' gaclenšque' le'e.”

³⁰ Can' goquen' bene' ca' chesonxene' Jesucriston' Jerusalénna' gosesele' bene' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaque' carten' gosesela' bene' Jerusalén ca'. ³¹ Na' cate' bene' Antioquía ca' bosolaben' besyebede' ca' consejon' nyoj le'e carta'. ³² Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chach laže'gaque' na' gosaclene' legaque' cont gosonxenche' Jesucriston'. ³³ Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen. ³⁴ Na' Silasen' bechoglaže' yega'ane' Antioquían'. ³⁵ Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

Pablon' gweje' da' yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén': —Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson bene' ca'.

³⁷ Nach Bernabén' goclaže' šja'aque' na' yeseche'e Juan ben' lecz le Marcos. ³⁸ Perw Pablon' gwne' bi gonen güen yeseche'ene' dan'

gwlejiychj Marcosen' legaque' cate' besežine' distritw Panfilian' na' bi benlene' legaque' xšin Diosen'. ³⁹ Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwche'e Marcosen' na' goso'e lo' barcw ja'aque' Chipren'. ⁴⁰ Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. ⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' chach laže' bene' ca' chesedop chesežag chesonxene' Jesucriston'.

Timoteon' gwzologüe' chonlene' Pablon' na' Silasen' txen

16 ¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. ² Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. ³ Da'nan' Pablon' gwnabe' šejlen Timoteon' legaque', nach gwchi'ene' gan' bosozoe' le' señw dan' že' circuncisión. Bene' ca' le yogo' bene' že' na' gosenezde' xa Timoteon' bi naque' bene' Israel na' Timoteon' bina' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'. ⁴ Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalénna' che da' ca' cheyala' yesone'. ⁵ Na' bene' ca' chesedop chesežag chesonxene' Jesucriston' gosenita'chache' gosejnilaže'ne' na' gwyanche' tža tža.

Pablon' ble'edagüede' to bene' distritw Macedonia chata'yoede' le' šeje' laže'

⁶ Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia. ⁷ Besežinte' gala'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesúsén' latje šja'aque'. ⁸ Nach gosodie' gala'ze distritw Misian' na' besežine' ciuda dan' nzi' Troas dan' chi' cho'a nesdaon'. ⁹ Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'." ¹⁰ Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsini'a cheto' cont gwza'to' gweyeto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. ¹² Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma. ¹³ Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjasel güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. ¹⁴ Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. ¹⁵ Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

¹⁶ Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan xen chombe' par xambe' ca' chneya'abe'. ¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocane.

¹⁸ Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

¹⁹ Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'. ²⁰ Na' cate' besežine' gan' že' justis ca', gose'e legaque':

—Bene' Israel quinga chesaše' chesebeque' da' zed lo' ciuda nga. ²¹ Na' chosolo'ede' costumbr da' bi de lsens gao' chio' naccho bene' Roma.

²² Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaque' cont goseyine' legaque' xis. ²³ Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwna'yane' legaque' cont bi yesyechoje'.

²⁴ Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bhide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca' do chel, chosol güiže' Diosen' na' chesole' no himno chesonxene' Diosen', na' yezica'chle bene' ca' zjade ližyan' chosozenague'. ²⁶ Nach zejzenez leca gwxo' na' bsesechguan len

yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'.

²⁷ Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene' xbab ba bosyoxonj yogo' bene' ca' zjade ližyan'. ²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'.

³⁰ Na' la' bebejte' legaque' lo' quart gan' zjajo'en', che'e legaque':

—¿Bi cheyala' gona' cont gata' yela' mban chia' toli tocane'?

³¹ Nach gose'e le':

—Gwejnilaže' Xancho Jesucriston', le' na' bene' lo' yo'o chio', na' gata' yela' mban chele toli tocane'.

³² Nach ben' chape' ližyan' gwche'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'. ³³ Nach ca' hora' ben' chap ližyan' gw dibe' lo' güe' che Pablon' na' che Silasen', na' gwdena' jasoe' nis len bene' lo' yo'o che' ca'. ³⁴ Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len bene' lo' yo'o che'.

³⁵ Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'. ³⁶ Nach le' gože' Pablon':

—Bene' gwnabia' ca' bach gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyeyebeje' neto'.

³⁸ Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma. ³⁹ Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo' ciudan'. ⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chač laže' bene' ca' chesonxene' Jesucriston' na' beyožen' besyeya'aque'.

Bene' Tesalónica ca' gosone' contr Pablon'

17 ¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyezine' to ciuda da' nzi' Tesalónica gan' zoa to yodao' che bene' Israel. ² Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' legaque' diža'. ³ Bzejni'ide' legaque' gože'ne' bene' ca'

goso'e xtiža' Diosen' cani' bosozoje' xtiža' Criston'. Gosene' ben' sela' Dios yedenabi'e, cheyała' yosoči yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesúsen' ben' choa' diža' che', le'na' Criston' ben' gwsela' Dios cont nabi'e.

⁴ Nach bał bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e. ⁵ Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'. ⁶ Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebał bene' chesonxene' Jesucriston' na' goseche'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. ⁷ Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' chegaque' ca' gosebecche' žaš. ⁹ Nach Jasónna' len bene' lježe' ca' bosozije' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'.

¹¹ Na' bene' Israel ca' že' Berean' zjanacche' bene' šagüe' clal ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan. ¹² Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao. ¹³ Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecz gosone' contr Pablon'. ¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'.

¹⁵ Na' to chop bene' Berean' ja'aque' jasesane' Pablon' ciuda dan' nzi'

Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsed blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l gua'a lsaca' da' chesejnilaže' bene' ca'. ¹⁷ Da'n'an' bzejni'ide' bene' Israel ca' lo' yodao' chegaque'na' len yezica'chle bene' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'.

¹⁸ Nach bene' ca' že'na' gwzolao chesoelene' le' diža'. Bale' chesejle'e dan' bzejni'i to bene' le' Epicuro, na' yebale' chesejle'e dan' bosozoj bene' ca' chesene' estoico. Na' bale' gosene':

—¿Bin' chon ža benga?

Na' yebale' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesús'en' na' ba be'e diža' Jesús'en' bebane' ladjo bene' guat. ¹⁹ Nach goseche'e Pablon' to latje dan' nzi' Areópago gan' chesedobe bene' blao chegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'. ²⁰ Biña' yeneto' diža' can' nac dan' cho'o nga na' chaclaže'to' nezeto' bi zejen yogo' da' ca'.

²¹ Ca nac bene' Atenas ca', de costumbr chegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

²² Nach Pablon' gwzeche' gachol legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l gua'a lsaca'.

²³ Cate' gwdia' tnez ble'eda' gan' chonxenle zan l gua'a lsaca', na' ble'eda' to latje gan' nyojen žan: “Che Xancho ben' nono nombia'.” Na' ca nac ben' chonxenle sin cbi nombia'le', che benan' chyixjue'eda' le'e.

²⁴ 'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon benachen' cont soe' len chio'. ²⁵ Bibi chyažje Diosen' gwnežjo benachen' le', na' bibi gac yesone' yesaclene' le'. Diosen' cho'e yela' mban che yogo'lol bene', cho'e legaque' biš grasyw na' cho'e legaque' yogo' bi da' zjanape'.

²⁶ 'Diosen' bene' bene' nechon', na' toz ca nac yogo' benach xi'in diaža che'. Na' bsi'e xneze bat nita' to toe' na' ga yesenite'. ²⁷ Diosen' bnite' yogo' benachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. ²⁸ Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': “Naccho diaža che Diosen'.” ²⁹ Na' dan' naccho diaža che Diosen' bi cheyala' goncho

xbab nac Diosen' ca no l gua'a lsaca' de oro, de plata o de yej.
 Chesaljlaže' beṇachen' chesone' da' ca'. ³⁰ Cani' Diosen' be'e latje goson
 beṇachen' con ca gwna xbab cḥegaque' yela' cbi chejni'i cḥegaque', perw
 na'a Diosen' chone' mandadw yogo'lol bene' že' doxen yežlion'
 yesebejyichje' da' malen' chesonen'. ³¹ Diosen' chaclaže' cuejyichjcho da'
 malen', le ba mbeje' Jesucriston' gone' yela' justis cḥe yogo' beṇach na'
 gwnežjue' castigw cḥe yogo' bene' cbi chesejnilaže' le', na' Diosen' zejcz'e'
 to licha dan' gone' ca'. Na' Diosen' ba nžie' bia' bat gone' yela' justis cḥe
 beṇach. Na' dan' bosban Diosen' Jesucriston' ladjo bene' guaten', nezecho
 Jesucristwnan' gone' yela' justis cḥe beṇachen'.

³² Cate' bene' Atenas ca' beyož gosende' gwna Pablon' yesyeban bene'
 guat ca', bale' gosezi'diže' le' na' yebale' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' bene' ca'. ³⁴ Perw bal bene'
 Atenas ca' gosaque' Pablon' txen na' gosonxene' Jesucriston'. Na' bene' ca'
 gosaque' Pablon' txen len to bene' byo le Dionisio na' yeto no'ole le
 Dámaris. Na' Dionision' naque' txen len bene' gwnabia' ca' ben' cheson
 yela' güexi'a gan' nzi' Areópago.

Ca goc šlac zoa Pablon' Corinto

18 ¹ Gwde goc da' ca', Pablon' beze'e ciuda Atenasen' na' gwyeje'
 ciuda gan' nzi' Corinto. ² Cate' bžine' Corinton' bežague' to
 bene' Israel le' Aquila bene' naque' bene' distritw Ponto, na' len no'ol cḥe'
 ben' le Priscila. Za' besyežingale' Corinton' zeya'aque' nación Italia, le
 rey Claudio, ben' chnabia' ca hora' doxen gan' mbane naciónna', bene'
 mandadw besyežaš yogo' bene' Israel ca' že' ciuda Roma. Nach Pablon'
 gwyeje' jane'e Aquilan' len Priscilan'. ³ Xšingaque' naquen chesone' yo'o
 de lache', na' toze ca nac xšin Pablon'. Nach bega'ane' gosenite' txen na'
 gosone' žinna' txen. ⁴ Na' yogo' ža cḥe Dios Pablon' gwyeje' yodao' cḥe
 bene' Israel ca' jazejni'ide' legaque' cḥe Jesucriston', cont bal bene' Israel
 len bal bene' bi zjanac bene' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian'
 besežine' gan' zoa Pablon', na' cana'ch Pablon' bsane' xšinen' cont gota'ch
 latje gwdixjue'ede' xtiža' Jesús'en' na' bzejni'ide' bene' Israel ca'
 Jesucristwnan' naque' bene' chesebeze' sela' Diosen' yedenabi'e. ⁶ Perw
 bene' Israel ca' beseže'e Pablon' na' bosožie' yela' ya' cḥe'. Nach Pablon'
 gwšibe' xe'na' cont blo'e chbejyichje' legaque', gwne':

—Bibi doła' napa' dan' cuiayi'le toli tocane. Le'e napple doła'. Na' na'a
 šjased šjalo'eda' bene' ca' bi zjanac bene' Israel.

⁷ Nach bechoje' lo' yodao'na' na' beze'e bežine' liž to bene' le Justo.
 Justo na'na' zoe' chonxene' Diosen' na' liže' zoan cuit yodao'na'. ⁸ Na' to
 bene' le Crispo naque' bene' gwnabia' cḥe yodaon'. Na' Crispon' len yogo'
 bene' lo' yo'o cḥe' gosaque' txen chesejle'e cḥe Xancho Jesucriston'. Na'

yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. ⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. ¹⁰ Neda' zoa' len le' na' bi goṇa' latje no gone le' da' mal, le bene' zan že' lo ciuda nga bene' chesonxene' neda'.

¹¹ Ca' goquen' bega'an Pablon' Corinton' tgiiz yogašje bsd blo'ede' legaue' xtiža' Diosen'.

¹² Na' ca tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadores' yela' justisen'. ¹³ Na' cate' besežine'na' gose'e gobernadores':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

¹⁴ Baḥ zoa ne Pablon' cate' gobernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis. ¹⁵ Perw naquen che diža', na' che bene', na' che ley chelen'. Da'nan' le gwye' nacle gonle. Bi co'o lo na' gona' yela' justis che dan' nac ca'.

¹⁶ Nach bešaše' legaue' gan' chone' yela' justisen'. ¹⁷ Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaue'.

Pablon' beyeje' Antioquían' da' yoble

¹⁸ Na' bega'anḥ Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' baḥ beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. ¹⁹ Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios. ²⁰ Na' bene' ca' že' lo' yodaon' gosata'yoede' le' yega'anche' len legaue', perw bi goclaže'. ²¹ Nach gože' legaue':

—Nayežagcho, le chonen byen soa' lni dan' šo' ciuda Jerusalénna', perw güidhcza' dena'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. ²² Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e

beyeje' ciuda Antioquían'. ²³ Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' čach laže' bene' ca' chesonxene' Jesucriston'.

Apolos gwdixjue'ede' xtiža' Diosen' ciuda Efeson'

²⁴ Na' ca tiemp na' bžin to bene' Israel ciuda Efeson' bene' le Apolos. Naque' bene' ciuda Alejandría. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. ²⁵ Apolosen' chejle'e dan' bzejni'i Juanna' che Xancho Jesúsén' na' nezde' can' bzoe' bene' nis caten' besyetingde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsed blo'e da' Juan na'zen' nezde'. ²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejže' le' na' bosozejni'ichde' le' che Jesucriston' da' ca' bina' nezde'. ²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bežue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'. ²⁸ Bzejni'ide' yogo'lol bene' gože'ne' clen' cheson bene' Israel gualaž chen' bi chesejle'e che Jesúsén'. Bzejni'ide' legaque' can' nyoj Xtiža' Diosen' žan Jesúsén' naque' Cristo ben' chesebeze' yedenabi'e.

Šlac gwzoa Pablon' ciuda Efeson'

19 ¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bał bene' chesonxene' Jesucriston'. ² Na' gože' legaque':

—¿Zedesoá Spiritw che Diosen' lo' yichjlažda'olen' caten' gwzolao chejnilaže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' gože'e legaque':

—¿Bi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

⁴ Nach gož Pablon' legaque':

—Da' Juanna' bzoe' bene' nis cate' besyetinge xtoła'gaque' na' lecze gože' legaque' cheyala' yesonxene' bena' za' sela' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsén'. ⁶ Nach Pablon' gwzoa

ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaue'. ⁷ Na' yogo' bene' ca' zjanac ca do šižinue'.

⁸ Na' do šone bio' Pablon' bsed blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaue' na' gwneyoede' legaue' yeson cuingaque' lo na' Diosen' cont nabi'e legaue' len xbab chegaquen'. ⁹ Na' bchoj bal bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' bene' ca' na' bebeje' ben' ba chesonxene' Jesúsriston' na' gwche'e legaue' gan' zoa to yo'o xen che to bene' le' Tiranno na' bzejni'ide' legaue' yogo' ža. ¹⁰ Na' gwzoa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsén', bene' zjanac bene' Israel lente bene' bi zjanac bene' Israel. ¹¹ Na' Diosen' bchine' Pablon' cont bene' yela' guac da' besyebanchgüe bene'. ¹² Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactedé' bi yižgüe' chese'ede', na' bene' ca' yo'o nyaz da' xigüe' yichjlažda'ogaue'na' lecze besyechojen.

¹³ Lecze chesaš bal bene' Israel chesyebeje' da' xigüe' da' zjajo'o lo' yichjlaždao' bene' na' gosaclačže' yosočhine' la Xancho Jesúsén' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsén' ben' choe' Pablon' xtiže'na' chonto mandadw yechojle.

¹⁴ Na' zoa to bxoz gwnabia' che bene' Israel le' Esceva, na' nita' gaže xi'ine'. Na' bene' quingan' bosochine' la Jesúsén' gosaclačže' yesyebeje' da' xigüen'. ¹⁵ Nach goc to šlas chesone' ca' cate' to da' xigüen' boži'in xtižen', gožen legaue':

—Nombi'a Jesúsén' na' ba benda' diža' che Pablon', perw bi nombi'a le'e cont šejli'a xtiža'len'.

¹⁶ Nach bena' yo'o nyaz da' xigüen' bxite' gwnize' bene' ca' betlate' legaue' na' gwcheze' xalana'gaue'. Nach bosyoxonje' liž bena' ga'alyide' na' bedo chen zjanaque' dan' bene' legaue' zi'. ¹⁷ Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsén' naque' bene' zaque'.

¹⁸ Nach bene' zan ba chesejle'e xtiža' Xancho Jesúsén', na' zane' gosexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. ¹⁹ Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. ²⁰ Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

²¹ Nach gwde goc da' ca' Pablon' bene' xbab yeyeje' Jerusalénna', na' goclaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecze cheyala' šeje' ciuda Roma. ²² Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebecchgüe' da' zed ciuda Efeson'

²³ Na' gwche' to da' zed gual ciuda Efeson', le nita' bene' beseže'e xtiža' Jesús en' dan' bsed blo'e Pablon'. ²⁴ Quinga goc: gwzoa to bene' le' Demetrio bene' chon yodao' dao' de plata da' naquen ca' nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan. ²⁵ Nach btobe' bene' ca' goson žin txen len le' na' nochle bene' goson žin dan' nac ca', na' gože' legaque':

—Nezele ca' nac žin dan' nlancho choncho nga, chonlenchon gan xen. ²⁶ Na' ba beneczele na' ba ble'eczele can' chon to bene' le' Pablo chsed chlo'ede' bene' lo' ciuda Efeso checho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l' gua'a lsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. ²⁷ Le gonšč xbab nacle goncho, le xož yesene' che žin dan' choncho nga, na' gague lezen, san lecze xož yesone' cont yodao' che xonax Diana chechon' yega'anen ca' to da' bibi zaca' na' len yela' chze na' yela' zaca' che xonaxen'. Na' nezele ca' nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

²⁸ Beyož gosende' xtiža' Demetron' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

²⁹ Nach gwche' da' zed doxen lo' ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo' ciudan'. ³⁰ Na' Pablon' goclaže' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo' ciudan' bi goso'e latje šo'e. ³¹ Bal' bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'. ³² Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjanezde' bichen' zjandobe'na'. ³³ Bene' Israel ca' bosožigue' to bene' le' Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyala' ne'. Na' Alejandron' gwlis ne'e cont gwñabe' nite' šize yosozenague' diža' dan' güe'e laogaquen' gwzoe' rson che bene' ca' chesejnilaže' Jesucriston'. ³⁴ Perw cate' besele'ede' le'

gosacbe'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

³⁵ Na' bene' güezoj chegaquen' cane goc bebeczie' legaque'. Na' gože'ne':

—Le'e bene' gualaž, yogo' bene' že' doxen yežlion' zjanezde' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba. ³⁶ Na' nono gac na da' yoble. Da'nan' le soa šize na' bich gonle da' bi zejen. ³⁷ Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'. ³⁸ Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'. ³⁹ Na' še bichle da' chnable gac, cheyala' goncho to yela' güexi'a cont choglaon. ⁴⁰ Perw ca nac žaš da' nga chac na'a, xož baga'cho choncho contr gobiern can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

⁴¹ Beyož gože' legaque' ca' bene' mandadw besyežaše'.

Pablon' gwyejche' distritw Macedonia na' nación Grecia

20 ¹ Nach cate' beyož gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaque': “Nayežagcho”, na' goseyela' lježe' na' beze'e beyeje' da' yoble distritw Macedonia. ² Na' gwdie' to to yež da' zjachi' gala'ze Macedonian' bene' chach laže' bene' ca' chesonxene' Jesucriston', na' beyožen' gwyejche' nación da' nzi' Grecia. ³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwnezde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. ⁴⁻⁵ Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo ben' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tíquico len Trófimo. ⁶ Na' gwde lnin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo ža cate' bžinto' ciuda Troas gan' ba nita' bene' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmi^gw besedobe be^{ne}' ca' chesonxene' Jesucriston' lo ciuda Troasen' na' gweyeto' güe'ej gw^dagwto' txen len lega^{que}', na' Pablon' bzejni'ide' lega^{que}' xtiža' Diosen'. Na' dan' ba zoa yeza' Pablon' ca gw^xeze nach be'e diža' bžinte do chel. ⁸ Na' yogo'to' ndop nžagto' to lo' yo'o de šon' cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. ⁹ Na' to bi' güego' lebe' Eutico žiabe' cho'a ventan. Na' Pablon' toⁿ zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'. ¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' be^{ne}' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len lega^{que}'. Ne' choe'te' dižan' ca' cate' gwyeni'. Nach beze'e.

¹² Nach bi'na' blažo' cho'a ventanna', be^{ne}' ca' že'na' besyeche'ebe' besyebechgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³⁻¹⁴ Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gweyeto' ciuda gan' nzi' Mitilene. ¹⁵ Bezsa'to' Mitilenen' na' beteyo bežinto' gała'ze to yežlio da' chi' lo' nisdaon' gan' nzi' Quío. Na' gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gweyeto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. ¹⁶ Ca' bento' bi gw^ddeto' ciuda Efeson', le Pablon' bi goclaže' šede' yež ca' zjachi' do distritw Asian'. Chacbyende' yob žine' Jerusalénna' še gała' soe' na' ža lni dan' nzi' Pentecostés.

Pablon' bšaljlene' be^{ne}' chosogüia chesene'e be^{ne}' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' be^{ne}' Efeson' be^{ne}' chosogüia chesene'e yezica'chle be^{ne}' ca' chesonxene' Jesucriston'. ¹⁸ Na' cate' besela'aque' Pablon' gože' lega^{que}':

—Nezele can' bena' caten' gwzoa' distritw Asia gan' zoa lažlen', bena' da' güen šlac gwzoa' len le'e gwzolaotia' ža nechw žan' bžina' na'.

¹⁹ Gwzoa' bena' xšin Diosen' na' bi benxen cuina'. Zan ni'a gwchežchgua' chele. Na' da' zan da' bosochi bososaca' be^{ne}' Israel ca' neda'.

²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole. ²¹ Bzejni'ida' be^{ne}' zjanac be^{ne}'

Israel gualaž chia' lente bene' cbi zjanac bene' Israel can' chaclaže' Diosen' yesyetinje xtoła'gaquen' na' yesejnilaže' Xancho Jesucriston'.

²² Na' na'a yeya'a Jerusalén, le Spiritw che Diosen' chonen byen yeya'a, na' bi nezda' bin' gac chia' yežina' na'. ²³ Con nezda' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a. ²⁴ Perw bi chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' benachen'.

²⁵ 'Ca nac le'e, ba bzejni'ida' le'e che yela' chnabia' che Diosen', perw na'a ne tole bich le'ele neda'. ²⁶ Da'nan' chnia' le'e bibi doła' napa' še nole cuiayi'. ²⁷ Bach bzejni'ida' le'e yogo' dan' chaclaže' Diosen' nezele, bibi bcuaša'. ²⁸ Da'nan' cheyała' cuec yichjle che yogo'loł dan' ba bzejni'ida' le'e na' lecze ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelaj xchene' beque'e xtoła'chon' cont bozoe' chio' binlo len Diosen' da' yoble. ²⁹ Nezda' cate' bich zoa' len le'e yesela'ac bene' yese'nde' yesexoayague' le'e cont cuejyichjle bich gwzenagle che Jesucriston'. ³⁰ Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaque'. ³¹ Da'nan' le gwsaca' cont nono yesexoayag le'e. Na' le gon xbab, le šon izen' ba gwzoa' bzejni'ida' le'e na' gwneyoeda' le'e do ža do yel gwchežtia' chele.

³² 'Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo ne'e. ³³ Bi chzelaža' bi da' de che bene', neca chzelaža' xmechwgaque' na' neca xagaque'. ³⁴ Nezczele can' bena' žin cont bžel da' byažjda' len da' beseyažje bene' ca' gosenite' len neda'. ³⁵ Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesúsén: "Mbalazech zoacho caten' chnežjwcho bi dan' chnežjwcho bene' clal ca caten' chesone' chio' bi dan' chesone' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'. ³⁷ Na' yogo'lole' gosebeže' che Pablon' na' goseyele' le' na' bosonope' ne'ena'. ³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

Pablon' beyeje' Jerusalén

21 ¹ Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bezžinto' ciuda Pátara. ² Na' cate' bežinto' Pátaran' bželetto' yeto barcw dan' chzan' šejen distritw Fenicia, na' beyo'oto' lo'enna'. ³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bezžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'. ⁴ Na' jaydiljwto' bene' ca' chesonxene' Jesucriston' Tiron' na' bega'anlento' leaque' to xman. Na' Spiritw che Diosen' bzenen leaque' cont gosata'yoede' Pablon' bi šeje' ciuda Jerusalénna'. ⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len leaque' bol' güižto' Diosen' cho'a nisdaon'. ⁶ Beyožen' bze diža' lježto' na' gwdeła' lježto', nach beyo'oto' lo' barcon' na' leaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' leaque' tža. ⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'. ⁹ Felipen' nita' tap xi'ine' no'ol güego' na' chosozende' bene' bi dan' ba gož Diosen' leaque'. ¹⁰ Zan ža ba gwzoato' liž Felipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'. ¹¹ Nach Agabon' gwnabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

¹² Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'. ¹³ Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsén'.

¹⁴ Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xanchon'.

¹⁵ Nach bsiñi'ato' beza'to' zjaydato' Jerusalén. ¹⁶ Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jaṇe'e Jacobon'

¹⁷ Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox. ¹⁸ Na' beteyo gwyejlento' Pablon' jaṇa'to' Jacobon', na' bžinto'na' ba zjandop zjanžag yogo' bene' blao ben' chosogüia chesene'e yezica'chle bene' ca' chesonxene' Jesucriston' na'.

¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'.

²⁰ Na' cate' bosozenague' dan' gož Pablon' legaque', nach goso'e yela' choxcen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés. ²¹ Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión. ²² ¿Nacxe ye'to' legaque'? le zane' yesežag nga cate' yesende' bač zo' nga da' yoble. ²³ Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. ²⁴ Na' cheyala' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'. ²⁵ Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

²⁶ Beteyo gwza' Pablon' gwche'e bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwduxjue'ede' le' bi ža yaṇen' yeyož yesaque' xi'laže' cont yosonežjue' beyixe' ca' gote' che to to legaque'.

²⁷ Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bal bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. ²⁸ Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal

juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

²⁹ Gosene' ca' neche da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwche'e le' lo' yodao'na', la'czla' bi bene' ca'.

³⁰ Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' gosenize' Pablon', besyebeje' le' na' la' bosyoseyjwte' puert ca'. ³¹ Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwnezde' ba chac to žašyey juisyw doxen ciudan', ³² nach btobe' soldadw ca' len bene' gwnabia' chegaque' ca', na' gosa'aque' zja'acsese' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. ³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' chope gden. Nach gwnabde' bene' ca' že'na' no nac Pablon' na' bi bene'. ³⁴ Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseche'e Pablon' cuartel. ³⁵⁻³⁶ Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neche dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to chope diža'?

Nach bena' gože'ne':

—¿Chaco' diža' griego? ³⁸ ¿Bi naco' bene' nación Egipto ben' gwda btob tap mil bene' güet bene' bat ngaze na' gwche'e legaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen ben latje güe'lena' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo' nepen' bene' señw len ne'e cont bene' ca' že'na' gosonite' šize bosozenague' che'. Nach gwzolağüe' be'e diža' len legaque' diža' hebreo.

22 ¹ Gože' legaque':

—Bene' gole len bene' xcuide', le gwzenag diža' dan' gua' laole nga.

² Na' cate' gosacbe'ede' chne' legaque' diža' hebreo gosenite' šize. Nach Pablon' gože' legaque':

³ —Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xoxxta'ocho ca'. Na' gocda' chonchgua' can' chazlaže' Diosen', cayanen' chaque le'e za'acle nga na'a. ⁴ Na' bchi bsaca' zan bene' ca' chesejnilaže' Jesucriston', goclaža' gotto' legaque'. Na' gwxena' no bene' byo na' no no'ole chesonxene' le' na' gwche'egaca'ne' ližya. ⁵ Bxoz ben' naquech bene' blao na' nochle bene' gole blao ca' chesenabia' nación Israel chechon' zjanezde' can' bena'. Legaque' gosone' yiš dan' bexua' gwy'a ciuda Damascon' gan' gocda' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

Pablon' cho'e diža' can' goc che' cate' Diosen' bocobe' yichjlažda'ogüe
(Hch. 9:1-19; 26:12-18)

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'. ⁷ Na' gwbiža' lo yon' benda' to bene' gože' neda': "Saulo, Saulo ¿bixchen' chchi chsaco' neda'?" ⁸ Nach boži'a xtižen', goša'ne': "¿No le' bene'?" Nach gwne': "Nedan' Jesús bene' Nazaret na' neda' chchi chsaco'." ⁹ Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsena' neda'. ¹⁰ Nach goša'ne': "¿Bin' cheyala' gona' Xana'?" Nach Xana' Jesúsena' gwne': "Beyas na' gwyejteze ciuda Damascon', na' cate' žino'na' to bene' ye'e le' dan' cheyala' gono'." ¹¹ Na' gwchola' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

¹² Na' to bene' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésena'. Na' yogo'lol bene' gualaž checho ca' že'na' cheso'e xtiža' Ananíasena' naque' bene' chon da' güen. ¹³ Ananíasna' bide' gan' zoan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'. ¹⁴ Nach gože' neda': "Dios ben' chonxencho na' ben' benxen da' xoxxta'ocho ca', len' ba gwleje' le' cana'te cont nezdo' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'." ¹⁵ Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'." ¹⁶ Na' lecz gož Ananíasena' neda': "¿Bichen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'ogüon' len da' malen'." Can' gože' neda'.

**Diosen' gwleje' Pablon' cont be'e xtižen' len bene' ca' bi
zjanaque' bene' Israel**

¹⁷ Na' gwdena' beyeda' ciuda Jerusalén ni na' gwy'a lo' yodao' blaon' jel' güiža' Diosen', na' šlac choł' güiža'ne' ble'edagüeda' Xancho Jesucriston'. ¹⁸ Na' Xanchon' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o chian'." ¹⁹ Nach goša'ne': "Xana', legaque' zjanezde' neda' gwy'a to to yodao' jet jatina' bene' ca' chesonxene' le' na' bseyjwgaca'ne' ližya. ²⁰ Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon' che bene' ca' gosot le'." ²¹ Nach Xancho Jesucriston' gože' neda': "Bchoj na' seła' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

²² Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

²³ Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. ²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bichen' bene' lo' ciudan' chososya'adie' che'. ²⁵ Na' ba zjancheje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

²⁶ Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdolan', le naque' bene' nación Roma.

²⁷ Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

²⁹ Nach bene' ca' ba nita' cont yeseyine' Pablon' la' besyecuate' cuiten', na' ben' yo'o lo ne'e yogo' soldadw ca' lecze bžebe' dan' ba bcheje' Pablon' cont yeseyine'ne'.

Gosesele' Pablon' gan' chosoxi'a bene' ca' chesenabia' Israelen'

³⁰ Nach beteyo ben' yo'o lo ne'e soldadw ca' gwseže' gdenna' nchej Pablon'. Na' bene' mandadw besedobe b̄xoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23 ¹ Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

² Nach Ananías ben' nacch b̄xoz blao bene' mandadw len bene' ca' zjaze cuit Pablon' yesebaže' cho'ena'. ³ Na' Pablon' gože'ne':

—iDiosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gala'ze gose'e Pablon':

—Bi cheyala' yoži'o xtižen' ca', le naque' b̄xoz blao che Dios.

⁵ Nach Pablon' boži'en gwne':

—Bene' migw, bi gwnezda' še benga b̄xoz blaon'. Nezda' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

⁶ Pablon' gocbe'ede' bene' ca' chesenabia' nación Israelen' zjanaque' chople. Bale' chesejle'e can' chsed chlo'e bene' ca' zjansi'e saduceo na' yebale' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neche chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' chople. ⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw. ⁹ Yogo' ben' že'na' chesosye'e chosošaše'. Nach to chope bene' zjansed ley dan' bzoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwnelen le', bi cheyala' goncho contr le', le' contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeleje' Pablon' ladjo bene' ca' na' besyeche'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyala' go'o xtižan' ciuda Roma.

Bosoxi'e yesote' Pablon'

¹² Na' beteyo ba_l bene' Israel besedobe' na' bosoxi'e yesote' Pablon'. Na' gosechogbi'en, gosene':

—Diosen' gone' chio' castigw še ye'ej gagwcho sin cbina' gotcho Pablon'.

¹³ Nde choa bene' bosoxi'e yesote' Pablon'. ¹⁴ Nach ja'aque' gan' že' bxoz gwnabia' ca' len bene' gole bene' blao ca' chesenabia' nación Israelen' na' gose'e legaque':

—Bač gwchogbia'to' gon Diosen' neto' castigw še ye'ej gagwto' sin cbina' gotto' Pablon'. ¹⁵ Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'.

¹⁷ Nach Pablon' goxe' to bene' chnabi'e to gayoa soldadw na' gože'ne':

—Ben goclen gwche' bi' nga lao bene' gwnabia' chelen'. De to da' ye'be' le'.

¹⁸ Bene' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwnabe' goclen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' bexue' na'be' gwche'ebe' to šla'ale gwnabde'be':

—¿Bi che'ndo' nao' neda'?

²⁰ Nach bi'na' gožbe' le':

—Bene' blao che bene' Israel gualaž cheto' ca' ba bosoxi'e yesenabe' cuejo' Pablon' gwxe na' yosode'ede' selo'ne' gana' chesežag bene' gwnabia' chegaquen' cont yeseyiljwyože' bi da' xinj non Pablon'. ²¹ Perw bi šejli'o chegaque'. Nde choa bene' ca' yesebe'na'ogüe' Pablon' tnez cont yesote' le' na' ba gosechogbi'en bibi yese'ej yesagüe' šlac bina' yesote'ne'. Na' ba chesebeze' gwzenago' chegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

Gosesele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososi'na' chegaque' cont šja'aque' ciuda Cesarea do cheda ga šeže'le na' yeseche'e chop gayoa soldadw bene' yesa'ac ni'aze na' gayonši bene' yesebia

cabayw na' ye_{ch}op gayoa soldadw bene' yesoxe' lanza. ²⁴ Lecze gože' lega_{que}' chyažje cabayw be cuia Pablon', le le'na' yeseche'e gana' zoa gobernadore_n' ben' le Félix, na' yesape' Pablon' cont bibi gac che' tnez.

²⁵ Nach bzoje' to cart che gobernadore_n' da' bgoxe' lega_{que}', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. ²⁷ Bene' Israel ca' ba gosezene' bengana' ba bosoxi'e yesote'ne', perw cate' gwnezda' naque' bene' nación Roma, gwy'a len soldadw chia' ca' jasla'ne' lo na'gaquen'. ²⁸ Na' cont nezda' bichen' chosocuiše' le', gwchi'ane' gan' chosoxi'a bene' gwnabia' che nación Israelen'. ²⁹ Nach gwnezda' chosocuiše' le' che bize da' chesac che' len ley chega_{que}'na', na' bi nacho bi da' mal ba none' cont yesote' le' o cont gate' ližya. ³⁰ Perw na' ba gwnezda' ba bosoxi'a bene' Israel ca' yesote' le', da'nan' la' chsela'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac chega_{que}' len le'. Si'xenšco' yogo' da' quinga chneyoeda' le'. Claudio Lisias.”

³¹ Nach soldadw ca' gosone' can' ben bene' gwnabia' chega_{quen}' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antípatris. ³² Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. ³³ Na' cate' besežine' ciuda Cesarean' bosonežjue' gobernadore_n' carten' zjanoxe'na' na' lecze gosone' Pablon' lo ne'e. ³⁴ Na' gobernadore_n' cate' beyož blabe' carten' gw_nabde' Pablon' ga bene' naque'. Na' cate' gwnezde' naque' bene' distritw Cilicia, ³⁵ nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

Pablon' be'e diža' lao gobernador Félix

24 ¹ Cate' ba_{ch} goc gayo' ža zoa Pablon' ciuda Cesarean', nach bžin Ananías ben' nac b_xoz blaoch che bene' Israelen' na' nche'e to chope bene' gole blao chega_{que}' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore_n' gosagüe' xya che Pablon'. ² Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Binlo juisyw zoa nación chechon' na' da' zan da' šagüe' ba chac da' chnabi'o neto'.

³ Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. ⁴ Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a. ⁵ Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chope. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež

Nazaret. ⁶ Na' goclaže' gone' da' mal juisyw lo' yodao' cheton' na' da'nan' gwzento'ne' cont chogbia'to' che' con can' ža ley cheton'. ⁷ Perw na' gwyaz Lisiasen' ben' nac bene' gwnabia' che soldadw ca' na' beque'ene' lo' na'ton'. ⁸ Na' gože' neto' cheyała' yidto' laguo' nga cont gwcuisto'ne'. Guac nabdo' Pablon' cuino' cont nezdo' nac da' li can' chcuisto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le can' naquen. ¹⁰ Nach gobernadore' bene' señw len Pablon' cont ne', na' Pablon' gwzolaküe' gwne':

—Nezda' ba goc zan iz chono' yela' justis che nación ni, na' da'nan' chbeda' gwzoa' rson chian' laguon'. ¹¹ Na'a chac šižinw ža gwy'a Jerusalénna' j Xenena' Diosen'. Na' guac nabdo' bene' ca' besele'e neda' še leca' naquen. ¹² Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo' ciudan'. ¹³ Na' bibi gac yeson bene' quinga cont yosolo'e napa' dola' ca' dan' chosocuiše' neda'. ¹⁴ Bi gwcuasha' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'lo' Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. ¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' can' nite' lez gon Diosen' ca'. ¹⁶ Da'nan' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi dola' napa' lao Diosen' ne lao benachen'.

¹⁷ Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. ¹⁸ Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca' ndop nžaga' bene' zan. ¹⁹ Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'. ²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. ²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': “Ca' nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat.”

²² Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca' hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beche' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

²⁴ Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gobernadores' bene' mandadw gosaxe' Pablon' da' yoble na' bzenague' be' Pablon' diža' gwne' yogo'lol bene' cheyala' yesejnilaže' Jesucriston'. ²⁵ Nach Pablon' be'lenche' le' diža' can' cheyala' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benach na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadores' gocde' še gwnežjo Pablon' le' mechw cont yosane' le'. Da'nán' goxe' Pablon' güeltze be'lene' le' diža'. ²⁷ Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'nán' bene' mandadw bega'an Pablon' ližyan'.

Pablon' bzoa rson che' lao gobernador Feston'

25 ¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalénna'. ² Nach bxoz gwnabia' ca' len nochle bene' blao che bene' Israel ca' ja'aque' jasene'e le' cont bosocuiše' Pablon'. ³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez. ⁴ Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le' neda' bich chžeda' ša'a na'. ⁵ Na' le cuej no bene' gwnabia' chele sela'le legaue' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa gobernadores' len legaue' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'. ⁷ Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosehjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. ⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'ane' binlo len bene' Israel ca', da'nán' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césaren' ba nzoe' le' cont gono' yela' justis, na' cheyala' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaque'. ¹¹ Šaca' ba gwdapa' dola' o bichle da' ba bena' da' cheyala' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan' chnaba' tia' lao rey Césaren' cont gone' yela' justis chian'.

¹² Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwnabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

¹³ Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedesequape' Feston' tiox. ¹⁴ Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'. ¹⁵ Na' cate' gwy'a Jerusalénna' bxoz gwnabia' ca' na' nochle bene' blao che bene' Israel ca' gosenabe' choglaguan' cont gaque' castigw. ¹⁶ Perw na' goše'gaca'ne' bi de costumbr che chio' bene' nación Roma gwdecho bene' yesaque' castigw še bi yesyedillagüen' len bene' ca' chosocuiš le' cont yosozoa rson chegaque'. ¹⁷ Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'.

¹⁸ Na' cate' bosocuiš bene' ca' le', ne toz da' mal dan' chacda' yosobague'de' le' bibi gosene'. ¹⁹ Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to bene' ba got, bene' le Jesús, na' Pablon' že' mbancze'. ²⁰ Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'.

²¹ Nach Pablon' gwnabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

²² Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxę gwzenago' che' šeca'.

²³ Nach beteyo gosacxenchgua rey Agripan' len Berenice cate' goso'e gana' chi' gobernadores, na' lecz zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandadw jasexi'e Pablon'. ²⁴ Na' Feston' gwne':

—Rey Agripa, na' len yogo' le'e že'le nga len neto', ca nac bengas ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' bengas naque' bene' mal na' yogo'cze' chesene' bi cheyala' bane'. ²⁵ Na' ba gwnabyoža' na' gota'bia' bibi none' da' zaca' choglaguan'

che' gate'. Na' ba gw_nabe' tie' lao rey César gone' yela' justis che', na' ba gw_{ch}eba' gw_dia'ne' ciuda Roma na'ale gan' zoa rey Césaren'. ²⁶ Na' chacžejlaža', le bibi chežellaža' gwzoja' reyen' yapa'ne' bin' none'. Da'nan' ba_{ch} gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. ²⁷ Chacda' bi naquen to licha sela'ne' Roman' sin cbi gwzoja' še bin' none'.

Pablon' bzo'e' rson che' lao rey Agripan'

26 ¹ Nach rey Agripan' gože' Pablon': —Guac nao' bi da' gac_lenen le'.

Nach Pablon' gw_lis ne'en lao bene' ca' gwz_olagüe' bzoa rson chen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'. ³ Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chxenlaže' gwzenago' chia' nga.

Quinga ben Pablon' cate' bi_na' šejnilaže' Criston'

⁴ 'Yogo' bene' Israel gualaž chechon' zjanezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. ⁵ Na' še chese'nde' yeso'e diža', lecze zjanezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogolo_l costumbr gole can' nyoj ley chechon' clel can' cheson yezica'ch bene' Israel gualaž checho ca'. ⁶ Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xozxta'ocho ca'. Neche da'nan' zoa' nga na'aža cont gac yela' justis chian'. ⁷ Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bal' bene' Israel gualaž chechon' chosocuiše' neda' nga rey Agripa. ⁸ Na' le'e chi'le chzenagle chia', čbixchen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ 'Cana' neda' gocda' cheyala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'. ¹⁰ Bene' zan bene' chesejle' che Jesúsen' Jerusalénna' gw_dixjua' ližya, gw_dapa' yiš dan' bosozoj b_xoz gwnabia' ca' cho'en diža' napa' yela' gwnabia' cont gona' ca'. Na' cate' gose_{ch}oglagüe' yesote' no bene' ca', goca' toze can' bosoxi'e yesone'. ¹¹ Na' zan las gwya'a to to yodao' jasaca' legaque' cont yesebejyichje' bich yesonxene' Jesúsen'. Na' catec bgue'eda' legaque' gwya'a yež zito' jalagšiba' legaque'.

Da' yoble Pablon' cho'e diža' can' goc che' cate'**Diosen' bocobe' yichjlažda'ogüe'***(Hch. 9:1-19; 22:6-16)*

¹² 'Can' goc to ža cate' zya'a ciuda Damascon', noxa' yiš che bꝑoz gwnabia' ca' dan' žan gwꝑhi gwsaca' bene' ca' chesonxene' Jesúsén'. ¹³ Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyeꝑjen neda' len bene' ca' zya'alena' txen. ¹⁴ Na' yogo'to' gwbiꝑto' lo yon', na' neda' benda' to bene' chne' diža' hebreo gwne': "Saulo, Saulo žbixꝑhen' chꝑhi chsaco' neda'? Dan' chondo' neda', chone zi' cuino' ca chon to goꝑ be chlibe lo ya dan' zoa lao carroš cheban'." ¹⁵ Nach bol güiža'ne', goža'ne': "žNo le' bene'?" Nach Xana' Jesúsén' boži'en, gwne': "Neda' Jesús na' neda' chꝑhi chsaco'." ¹⁶ Beyas, le baꝑ blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. ¹⁷ Na' na'a sela' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. ¹⁸ Chsela' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtola'gaque', na' lecze chaclaža' yesaque' txen len nochle bene' chesejnilaže' neda' bene' ba zjanac lo na' Diosen'."

Pablon' bsed blo'ede' bene' xtiža' Criston'

¹⁹ 'Ca' goc chia' rey Agripa, bzenaga' ca dan' gož Jesúsén' neda' zoe' yaban' caten' ble'edagüeda'ne' tnez. ²⁰ Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyała' yesebejyichje' xtola'gaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. ²¹ Na' neꝑe dan' chona' ca', bene' gualaž checho bene' chesegue'ede' neda' gosezene' neda' yodao' blaon' na' gosaclaže' yesote' neda'. ²² Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bzoj da' Moisésén' len yezica'chle ben' goso'e xtiža' Diosen' cani'. ²³ Gosene' Criston' ben' za' sela' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecze gosene' le'na' gwzende' bene' Israel len bene' bi zjanac bene' Israel can' cheyała' yesone' cont šo' be'ni' che' lo' yichjlažda'ogaque'.

Pablon' goclaze' šejnilaze' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' zižje gože'ne':
—iChactonton' Pablo! Dan' ba bsedteco' nan' bač chactonto'.

²⁵ Nach Pablon' gože' gobernadoren':

—Bi chactonta' señor gobernador, san diža' lin' cho'a, diža' da' zaca' gwzenago'. ²⁶ Na' rey Agripa nga nombi'e da' quinga choa' diža' chen, da'nan' bi chžeba' choa' diža' lagüe' nga. Nežda' chacbe'ede' choa' diža' li, le dan' goc che Jesúsen' bi nacho goquen bagaše'ze. ²⁷ Le' rey Agripa, ¿chejli'o da' ca' bosozoj bene' ca' gosoe xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Chnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

³⁰ Beyož gwna Pablon' ca' bezoža' rey Agripan' len no'ol chen' Berenice, na' len gobernador Feston' na' len bene' ca' gosebe' len legaue'. ³¹ Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi nacho ba non benga da' zaca' gate' o da' zaca' chixjwchone' ližya.

³² Nach rey Agripan' gože' Feston':

—Šaca' bi gwñabe' tie' lao rey Césaren' cont gac yela' justis che'na' guac yosanchone'.

Gosesele' Pablon' ciuda Roman'

27 ¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo' na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. ² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia. ³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' bene' migw che' ca' cont bosonežjue' le' bi dan' byažjde'. ⁴ Na' cate' bechojto' ciuda Sidónna' beza'to' bedeto' gała'ze gan' nla' yežlio dan' chi' lo' nisdao' dan' nzi' Chipre. Chechjchgua be' clele ca horen', na' yežliona' bcue'ejen neto' len be'na'. ⁵ Na' beyož gwdeto' lo' nisdao' dan' de gała'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'. ⁷ Nach gwza'to' zejto' lo nisen' da' yoble. Zan ža zejto' šolaže', canē bžinto' gwdeto' ciuda gan' nzi' Gnido. Na' dan' ne' chechj ben' clele gan' zejton', da'nān' bi goc šejto' licha, nach gwca'ato' zejto' chcue'ej cuinto' len yelate' yežlio dan' nga'an lo' nesdaon' dan' nzi' Creta, gan' bitec gwyechj be', na' gwdeto' gała'ze gan' zoa to ya'a da' nzi' Salmón. ⁸ Na' zejto' gała'ze ga zoa yo biž chcue'ej cuinto', canē bžinto' gan' nzi' Buenos Puertos gała'ze yež dan' nzi' Lasea.

⁹ Goc zan ža zejto' ca' na' bačh chžebto' šjažiyi' cuinto' lo' nesdaon', le ba bžin tiemp zag cate' chechjchgua be'. Nach Pablon' gwneyoede' bene' ca' yesebeze' na'ze. ¹⁰ Gože' legaue':

—Le'e bene' le'e chsa'le barcon', ba chacbe'eda' can' zejcho nga canē chac chzan', xož cuiayi' barcon' len yoa' chelen', na' lente chio' yo'ocho lo' barcon' xož cuiayi'cho.

¹¹ Nach xan soldadw ca' bzenagche' che xan barcon' na' che ben' chsa' len clel ca' che Pablon'. ¹² Le bi nac latje güen cho'a nesdaon' gan' zoaton' ga'anto' tiemp zaguen', na' gwyān bene' ca' gosacde' cheyala' sa'to' šejto' še gonēn žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyechjen lo nesdaon'

¹³ Cate' gwzolao chechj to be' goł dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej che Cretan'. ¹⁴ Gague goc sša cate' ba chac to be' gual da' nzi' Noreste chechjchguan clele gan' zej barcon'. ¹⁵ Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chechjenna'. ¹⁶ Nach bžinto' to lcue'ej yežlio da' nga'an lo' nisen' dan' nzi' Clauda, gan' bitec chechj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' canē goc bocueto' barcw daon' lo' da' cha'ona'. ¹⁷ Beyoža' bchejto' barcw cha'ona' do gual cont gwlo'oto' fuers chen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'.

¹⁸ Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzolao bosozala'sazen' lo' nisen'. ¹⁹ Na' ža gwyone goclento' legaue' bzala'to' xšinlaz barcon' lo' nisen'. ²⁰ Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

²¹ Bačh goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwziayi' yoa' che barcon' len xšinlazen. ²² Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'. ²³ Neda' chonxena' Diosen' na' ba ben cuina' lo ne'e, na' le' ba gwsele' to angl bene' blo'elagüe' neda' nže'e. ²⁴ Nach angla' gože' neda' diža' nga: “Bi žebo' Pablo. Cheyala' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'.” ²⁵ Na' dan' gwna anglen' ca', bene', le yebe. Nezda' Diosen' gone' gac dołol can' gož anglen' neda'. ²⁶ Da' gac checho yecho'onen chio' yo biž da' nga'an late' lo' nisen'.

²⁷ Na' cate' ba goc žta'gwbiž zejto' lo nisen' nžiga' ben' neto' nile nale lo nesdaon' dan' nzi' Adria, nach ca do chel bene' ca' zjansa' barcon' gosacbe'ede' ba zejto' gala'ze yo biž. ²⁸ Nach beseletje' to plom lo' nisen' cont boso'ochixē' ca do gaca'te' sitjw nac nisen'. Beyož bosochixen'na' gosenezde' goquen šino'tochoa metr. Nach gosezdie' yelate' na' bosozchixen' da' yoble na' ca horen' goquen gažechoa metr. ²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochējen' xan barcon' cont gosoxen' len, na' do chesežebze' chesebeze' batcan' šeni'. ³⁰ Nach bene' ca' zjansa' barcon' gosaclaže' yosyoxonje'. Besyeletje' barcw dao' dan' ncu'a' xina' barcon', con bosode'ede' yeseletje' ancla ca' dan' ncu'a' lagüen'. ³¹ Nach Pablon' bol güiže' xan soldadw ca', gože'ne':

—Še bene' quinga bi yesyega'anē' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolaogwneyoede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bexue' to yetextil, be'e yela' choxcen che Diosen' lao yogo' neto' že'to' lo barcon' na' gwxi'e to pedasen' gwdagüen'. ³⁶ Nach yogo'to' bebeto' na' lecz gwzolaoto' gwdagwto'. ³⁷ Chop gayoa gayonšino'to' nacto' že'to' lo' barcon'. ³⁸ Na' beyož gwdagwto' ca beljeto', nach trigon' da' ne' nga'anč lo' barcon', gosebejen' bosozalen' lo' nesdaon' cont barcon' bich goctequen ži'i.

Goj barcon'

³⁹ Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enña' nac laše' lo yox. Nach gosaque' toze gosaclaže' yesone' cont žin barcon' šjachen' laše' lo yoxen'. ⁴⁰ Na' gosechogue' do che ancla ca', gosebejyichjen' lo' nisen'. Lecze goseseže' do dan' bosochēje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'.

⁴¹ Na' gosedi'e ga chedi_l nesdaon' len yeto da' yoble, na' ja_chaz lagüe barcon' lo' yoxen', bich goc tan. Na' nisen' gwzolao bzo_xjen barcon' catec fuers nsan'. ⁴² Nach soldadw ca' gosaclaže' yesote' pres ca' cont bi yeseyele' nisen' na' yosyo_xonje'. ⁴³ Perw xan soldadw ca' goclaže' yosle' Pablon', da'nan' bžone' yeson soldadw ca' can' chesaclaže' yesonen'. Bene mandadw len pres ca' še noe' chac chyela' nisen' zgua'tec legaque' yesexite' lo nisen' cont yesyechoje' yo biž. ⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšin_laz barcon' cont yesyežine' lo yo. Na' can' gosone' na' yogüe' besyežine' lo yo bižen'.

Dan' goc che Pablon' šlac zoe' Malta

28 ¹ Cate' bechojto' lo' nesdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo yežlio da' nga'anen lo' nesdaon'. ² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. ³ Nach Pablon' btobe' xonj xis bcue'en lo yin', cate' bchoj to bel be nac venen lo xis ca' gwdi'inba' ne'e go_la'ditban'. ⁴ Na' besele'e bene' Malta ca' na_la'dit belen' na' Pablon', na' gose' lježe':
—Benga naclje' bene' güet bene'. Da'nan' la'czla' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo yin' na' bexope belen', na' bibi gocde'. ⁶ Yogo' bene' ca' chesebeze' batcan' solao gata' ne'en yi o batca' gate'. Gosebeze' šša na' besele'ede' bibi gocde'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden ga_la'ze latje gan' bžinton', na' blebe' neto', gwzoato' ližen' šone ža. ⁸ Na' xa Publion' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' bol güiže' Diosen', nach gw_xoa ne'en yichj bene' güen' na' beyaque'. ⁹ Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaque', na' lecze besyeyaque'. ¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l gua'a lsaca' che bene' ca' le' Cástor na' Pólux.

¹² Na' bžinto' ciuda dan' nzi' Siracusa gan' bega'anto' šone ža. ¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elle, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'. ¹⁴ Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'. ¹⁵ Na' cate' za' žinto' ciuda

Roman' goseneze bene' lježto' že' Roman' ba zoa žinto', na' bale' bedeseleze' neto' latje gan' nzi' Šone Tiend na' yebale' lagüe ya'a dan' nzi' Che Apio. Cate' ble'e Pablon' legaque' be'e yela' choxcen che Diosen' na' gwbede' lo' yichjlažda'ogüe'. ¹⁶ Na' cate' bžinto' Roman', xan soldadw ca' bene' yezica'chle pres ca' lo na' bene' gwnabia' che soldadw ca' nita' na', perw be'e latje gwztoa Pablon' toze' ga yoble na' con gwztoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' bene' blao che bene' Israel ca' že' ciuda Roman'. Na' cate' beyož besedobe'na' gože' legaque':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo na' bene' gwnabia' che nación Roman', la'czla' bibi bena' contr bene' gualaž ca' na' ne contr costumbr che da' xoxxta'ochon'.

¹⁸ Nach bene' gwnabia' che nación Roman' gosenabyože' na' gosaclačže' yososane' neda' cate' gosacbe'ede' bibi nona' da' zaca' yesote'nda'. ¹⁹ Nach bene' gualaž ca' že' Jerusalénna' bosožoncze' yososane' neda'. Da'nan' gwnaba' tia' lao rey Césaren' cont gac yela' justis chia'. Perw bi nacho gagua' xya che bene' gualaž checho da' gosonde' neda' ca'. ²⁰ Da'nan' zoa' nga bač goxa' le'e cont le'eda' le'e na' güe'lana' le'e diža'. Na' ncheja' gden ni neche dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

²¹ Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diža' še bin' chac len le', na' nono bene' gualaž na' la' bene' ne mal chio'. ²² Perw chaclaže'to' yeneto' go'o diža' che dan' chejli'o che Jesús'en', le nezeto' doxen chesene' che le'e chejle'le che'.

²³ Na' bosozie' bia' to ža cont šjasene'e le' da' yoble, na' cate' bžin žan' bene' zan ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisés'en' na' len dan' bosozoj yezica'chle bene' goso'e xtiža' Diosen' cani' che Jesucriston', cont yesejle'e che'. ²⁴ Na' bal' bene' ca' gosejle'e xtižen' da' be'e na' yebale' bi gosejle'en'. ²⁵ Dan' bi gosone' toz ca' yesone' xbab, gwzolao besyeya'aque'. Nach Pablon' gože' legaque':

—Dan' gož Spiritw che Diosen' da' Isaías'en' dan' bzoje' che da' xoxxta'ocho ca' naquen da' li, žan:

²⁶ Gweyeg gož bene' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

²⁷ Nacle bene' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjlele xto_la'le cont yeca'an na' yocoba' yichjlažda'olen'.

²⁸ Che'nda' nezele ba gwzolaon na'a Diosen' chsele' bene' cheseyixjue'ede' xtižen' len bene' bi zjanac bene' Israel cont yosozenague' che' na' gata' yela' mban chegaque' toli tocane.

²⁹ Beyož gwna Pablon' ca', bene' Israel ca' besyežaše' chesacyožchgüe' che dan' gwnen'.

³⁰ Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'lol bene' jasene'e le'. ³¹ Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' bene', na' be'e xtiža' Diosen' con can' goclaže'.